

PROSE VERSI E ALTRI OPUSCOLI

RACCOLTI, E ORDINATI

DA GIAMBATISTA BOCCOLINI

CLASSE QUARTA

Che contiene le cose stampate in quarto
dall' Anno 1610. fino all' Anno 1690.

VOLUME XV.

CON DIVERSE ANNOTAZIONI,
ET INDICI.



PROSE VERSI

E ALTRI OPUSCOLI

RACCONTI, E ORAZIONI


DA GIAMBATTISTA VICOLO

CLASSE QUARTA

Con prefazione di G. Vico
e con note di G. Vico

VOLUME

CON DIVERSE AVVERTENZE
DI VICO




PAGANINI GAVDENTII

RHÆTIC.
In Gymnasio Pisano Eloquentiæ Professoris.

DECLAMATIONES OCTO.

Extra ordinem habita Anno MDCXXIX.

QVAVM CONSPECTVM VERSA PAGINA EXHIBET.



FLORENTIÆ, Apud Simonem Ciottum M. DC. XXX.
DD. SVPERIORVM PERMISSV.

DECLAMATIONVM

Conſpectus.

- I. DE RATIONE CONSEQUENDI ELOQVENTIAM PER MVLTIPlicEM Vsvm IN VITA CIVILI.
- II. DE NOBILITATE.
- III. DE IVBILATO.
- IV. DE CAVSIS RVINAE IMPERII ROMANI.
- V. DE PRAESIDIIS MEMORIAE.
- VI. DE TRIPlici CATENA.
- VII. DE AVGMENTO MAGNORVM IMPERIORVM.
- VIII. DE TRIPlici MYTATIONE RERVM ROMANARVM.



SER.^{MO} ETRVRIÆ
MAGNO DVCI
FERDINANDO SECVNDO:



Rælectionibus meis in
Tacitū præludunt De-
clamations octo, in
quibus sic historiam
tracto, vt Ciuiles cogi-
tationes interponam;
sic eloquentiam profiteor, vt grauiori-
bus monitis cupiam prodesse; sic per om-
nem materiam liberè excurro, vt à pro-
posito non discedam, quod est excitare
bonas mentes ad robustam Sapientiam,

& sub pedibus videre, imò premere ple-
beiorum animorum trepida simula-
chra . Animaduerto , quàm arduum
clium conscenderim, prospicio non es-
se mearum virium montem tam subli-
mem superare. Ergo ad Vestre Celsitu-
dinis benignitatem confugio , sine qua
nihil vel minima laude dignum possit à
me proficisci. Externus sum, procul à pa-
tria sum, & quidem iam prope funditus
excisa ; nullus hic aut sanguine mihi iū-
ctus, aut longā consuetudine notus . O-
mnium oculi, & quidem acerrimorum
hominum in me coniecti. Professio mi-
hi imposita eiusmodi est, vt perpetuam
alacritatem, quotidianam promptitudi-
nem, lingue expeditam volubilitatem ,
rerum variā, & prope immensam cogni-
tionem , accuratam dicendi rationem
requirat . Iam si quisquam in ordinem
redigendus, vt secum habitet, opus pro-
vida cura, & accurata libertate. Inter
hæc, quid est quod meo animo perpetuā

securitatem suppeditat? Dum cogito, quis ille sit, cui operã meam qualem eũq; nauo. Princeps nempe, qui, si quisquam mortaliũ, feliciter, & acriter ingenia dignoscere potest; cui nullus poterit inania verba pro solidis rebus obtrudere, quiq; iam diu apud se statuit, virtutem præcipuam eius, qui salutem populorum sibi subiectorum promouere velit, esse, non aliunde, quam ex rebus gestis discrimen inter homines constituere. De Vestra Serenissima Celsitudine mihi esse sermonem, quotusquisq; est in hac regione qui non intelligat? Iam igitur magnę spei sum plenus, has Declamationes nõ indignas visum iri, quas semel atq; iterũ in manus sumat; & si qui sint, qui calidè eas oppugnent, iubeat eos aut tam bona, aut meliora præstare. Nouit optimè Celsitudo Vestra esse plurimos, qui in hac vitæ humanæ fabula nihil ipsi agunt, tantum quomodo alij se gerant Catoniano supercilio iudicant.

sed neq; publicè id faciunt, tātum pren-
fant quosdam semihomines, in aurem
de libris maledicunt eorum, quos imi-
tari, si vel Nestoream ætatem viuant, nō
poterunt, & quibuscum palam congre-
di nunquam audebunt. Dabam Flo-
rentiæ Cal. Iulij. M. DC. XXX.

V. Celsit. Ser.^{ms}

Subiectissimus Seruus

Paganinus Gaudentius.


PAGA-

4

PAGANINI
GAUDENTII
IVRISCONSULTI,
DECLAMATIO PRIMA.

De ratione consequendi Eloquentiam per
multiplicem vsum in vita ciuili.

Habita in solempni studiorum instauratione.



X hac ipsa sede anno præteri-
to cum de ratione consequen-
di Eloquentiam dissererem,
duobus opus esse eiusmodi
facultatem consecuturo con-
tendebam; Magna nempe rerum cognitio-
ne, & multiplici vfu in vita ciuili. De pri-
mo ita locutus sum, vt in vobis summam be-
neuolentiam, atq; humanitatem expertus
sim, deq; tanto erga me affectu ubiq; fui glo-
riatus. Si namq; Florentiæ à Serenissimo Ma-
gno Duce maxima cum benignitate fueram
admissus, vos profectò nihil omisistis eorum,
quibus

quibus vir externus, & qui tunc primum pedem in hac regione ponebat, ad rem strenuè gerendam posset excitari. Quod si hominem adhuc ignotum tam proluxa comitate excepistis, si orantem tam attentè audiuiſtis, si orationem honorifico testimonio ornare voluistis, quid iam mihi non potero polliceri? Postquam res meæ in hoc celeberrimo Gymnasio eò sunt progressæ, ut vix vllum putem esse inter vos, qui me sibi priuatim aliquo non deuinxerit beneficio. Certè plerique ita mecum egistis, ut fauor vester in amicitiam, amicitia in amorem, amor in familiaritatem transisse possit videri. Ut ita loquar, qui vobis, excellentissimi Doctores, longè sum inferior, facit affectus vestri erga me magnitudo. Qui igitur semper beneuolè mecum agitis, adeste, & meam imbecillitatem, dū de Ratione cōsequendi Eloquentiā per multiplicē vsu in vita ciuili dissero, eadē beneuolētia subleuate. Illud ante omnia, Auditores, dicamus oportet, discriminē esse constituendū inter eloquentiā, quam sic vocabo vmbriticā, quæ lese intra certum hominum genus continet, & Scholarum parietibus inclu-

ditur; & inter illam, quæ ludicras exercitationes spernens vim suam transfert ad quotidianos congressus, ad negotia magni momenti tractanda, ad demulcendos animos, ad varios affectus in hominibus excitandos: Huic seriæ, huic robustæ, huic laboris plenæ, præluit illa non aliter quam cum leone congressurus taurus arenam iactat, arbo-rem petit, cornua acuit. Nec ullus, sat scio, inter vos fuerit, qui existimet, me dum de Ratione consequendi eloquentiam dissero, hoc agere, vt diuinam, & prope dixerim immensam facultatem limitibus Scholasticæ, & eruditæ declamationis circumscribam. vt enim quis in Rhetorum gymnasijs vim suâ in dicendo ostendet, non opus fuerit multiplici illo vsu in vita Ciuili, quem ad eloquentiam consequendam studiosis iam suscepimus commendandum. Exultauit olim inter oratores vmbraticos Isæus, cui torrentem dicendi copiam scimus à locupletibus auctoribus adscriptam. Is quia declamandis controuersijs plurimum operæ, & temporis impenderat, derepente conscendens subscelia, de quocunq; argumento, quod homini

proposuisses poterat non sine celeritate orare, plurima in medium proferre, & auditorum etiam doctum admiratione replere. Qui interim nunquam fuisset in forum venire ausus, reos tueri, causas agere, de lege aliqua vel ferenda, vel antiquanda in amplo Iudicium confessu cum aduersario congregari. Nouerat ille sua bona, nouerat quibus studiis se ab ineunte ætate dedidisset, nouerat satius esse cum securitate tueri veram laudē, licet non adeò latè patētem, quam maiorem affectando, eam quam iam erat adeptus, amittendi periculum subire. Nos verò sic Iſæi Eloquentiam, sic cæteros dicendi Magistros extollimus, & meritis laudibus ornamus, ut studiosę iuuentuti simus auctores, ut ad illam Eloquentiā adspirent, qua possint Amicis prodesse, rem suam promouere, patriam ornare, Principi, ubi ad honorificū aliquod munus fuerint vocati, inservire. Huc, fateor, tendimus, huc arcum orationis dirigimus, dum permultiplicem vsum in vita ciuili ciuilem Eloquentiam gigni, atq; augeri disputamus. Et simul ad alterum transimus, quod causę nostrę muniendæ præstruimus, ad Prudentiam

dentiam scilicet, sine qua si quis speret se posse veram laudem ob Eloquentiam non umbraticam, sed ciuilem adipisci, ne ille in maximo errore versatur, & tandem se in magnarum cognitione consequenda operam perdidisse, quando emendationi amplius non fuerit locus, dolebit. Si nihil est tam sanctum, tam rectum, tam iustum, quod absque modo si fiat, reprehensionem non mereatur, absque prudentia in molestissimam garrulitatem degenerabit eloquentia. Et ille rebus suis optimè consulit, qui cum ea, quæ didicit, tempestiuè proferre nesciat, saltem silendo, se prudentia non destitui ostendit. Hæc causa est cur modestia iuuenes, silentium mulieres coret, quia impetu cum ferantur, dum multa loquuntur, molestiam auditoribus, non adferunt voluptatem. Hinc etiam factum est, ut dixerint viri sapientes fieri non posse, aut saltem difficillimè posse, ut quis multa, & bene loquendo in medium adferat. Vir namque prudens, non quicquid in mentem, & ut ille dicebat, buccam venerit, effutit, sed secum prius habitans sensa animi velut ad lancem expendit, cauetque dili-

gentissimè, ne cogatur cum pudore, cum de-
 decore sepiùs repetere illud: Nolim dictum.
 Cur quæso, Auditores optimi, prouida rerû
 parens Natura, duabus auribus, vno ore ho-
 minem instruxit? nisi quia voluit hoc artifi-
 cio indicare plura esse audienda, atq; adeò
 animo reuoluenda, & supputanda, quam ore
 emittenda, ex quo quidquid semel fuerit
 profectum reuocari non potest, redire ne-
 scit; volat per ora hominum, & sepiùs vn-
 de commendationem sibi quis pollicebatur
 & laudem, vituperationem colligit non fa-
 cilè obliterandam. Hic itaq; omnes in-
 genij vires sunt excitandæ, excutiendus ve-
 temus, diligentia adhibenda non vulgaris;
 quandoquidem de re maximi momenti agi-
 tur, de eloquentia ciuili, vt si magnam rerum
 cognitionem fuerimus consecuti, in rem
 præsentem, quibus fuerit opus, rationem af-
 sequamur depromendi.

Hic nonnulla omittuntur.

Laurentius Medices ob animi magnitudinẽ,
 & acrem eloquentiam præcipuè commen-
 datur. Ille ipse, cui quod artes, quibus elegã-
 ter vrbes instaurantur, regnent, Europa, nisi
 ingrata

ingrata esse velit, imputet necesse est. Is in
maximo discrimine constitutus, illinc fu-
rentibus in populo hostibus, hinc Rege Nea-
politano arma parante, quò quèlo cōfugerit,
existimatis auditores? Iam scitis eum ad E-
loquentiam tanquam ad sacram anchoram
se recepisse feliciter. O egregiam mixturam,
quam in animo ipsius fecerant ingenij cele-
ritas, mentis erectio, promptitudo in profe-
rendis ijs, quibus opus esset. Breuiter dicam,
ita erat eloquens, vt magnanima prudentia
esset instructus. Regem vltro adiit, quem nō
solum flexanima oratione placauit, sed eum
ita sibi conciliauit, & in suas partes traxit, vt
ipsius auctoritate interposita in pristinum,
imò maiorem splendorem restitutus fuerit.
Eant nunc mortales, & si Dijs placet, pruden-
tiam ab Eloquentia seiungant, imò cogi-
tent nullum esse maius homini cum difficul-
tatibus luctanti munimentum, quàm si sciat
causam suam tueri ita acriter, & intrepidè, vt
in alterius beneuolentia omnem suam spem
collocare velle videatur. Dicit namq; non po-
test, quantopere delectetur is, à cuius volun-
tate pendet nostra incolumitas, si audiat ho-
minem

minem collecto animo stringentem tela rationum cautè, vehemèter, liberè, vt eius dicta ad minimum vsq; verbum à profunda sapientia dictata cogatur apud seipsum fateri. Habemus nos, qui in Etruria degimus, quando de maximis virtutibus sermo est, & præsertim potentissima eloquentia, habemus, inquam, exempla, quæ Græcis sua tantum mirantibus, & multa fingentibus opponamus. Etiam extra Romanam historiam suppetunt domi splendidissima ornamenta, ad quæ non dicam imitanda, sed post longum interualum sequenda non poterunt assurgere nisi egregiæ mentes. Inter quæ circumspecta, & multiplex, & expedita eloquentia cum florentissima familia quæ imperat, non interrupto more coniuncta est. Serenissimus Magnus Dux Ferdinandus Secundus, sub cuius dominatu floret hæc regio, ideò perpetuam laudem ex itinere, quod anno præterito suscepit, reportauit, quod licet iuuenis posset quibuscumq; de rebus, quarum incideret mentio promptè, appositè loqui, vt semper agnosceretur, & Magnus Princeps, & magna rerum cognitione supra ætatem

præditus, & cui perennis dicendi felicitas in
omne momentum suppeteret. Certè vi-
ri insignes, quibus contingit ipsum alloqui,
in eiusdem admirationem rapiuntur, quod
accuratissimè obseruet, quod suam dignita-
tem decet, & tamen tam placidè, tanta cum
facilitate, de omnibus ijs, quæ in vitâ ciuili
euenire possunt, colloquatur. O nos beatos,
qui prudentiam cum eloquentia coniunctâ
volumus. Nam si nulla alia ratione nitere-
mur, quis non illico nostræ opinioni, quam
Serenissimi Domini tuetur exemplum, ap-
plauderet? Ita expeditior ad tertiū transgre-
dior, ne vos per multas cogitationes detineâ,
humanissimi Auditores: Vt quia eloquens
nequit esse, qui non sit prudens, & pruden-
ter nequeat aliquis loqui, de quibus nullū
vsum habeat, hoc Eloquentiæ studiosus sta-
tuat secum oportet, vitæ ciuilis omnes par-
tes sibi peruadendas, nullum non hominum
genus cognoscendum, in omnes formas se-
vertendum. Eloquentiæ propria laus est,
varios motus in animis hominum ciere, huc
illuc eos impellere, quaslibet opiniones men-
ti ipsorum inducere, quæ rebus nostris pro-
sint,

sint, commoda promoueant. Hoc ut quis consequatur ex animi sententia, annon illorum ingenium, quos alloqueris, diligenter est peruestigandum? mores indagandi? consilia excutienda? Hinc quibus rationibus moueri, duci, trahi possint discas, hinc quibus artibus in tuas partes inuitari possint, ut veniant, assequeris. Quod si imparatus, si destitutus praesidio, quo semper se muniuerunt mortales, ad suadendum accedas, non solum quicquam proficies, sed irritabis potius, inuidiam, odium in te deriuabis, quos accessuros sperabas, auertes. Non alia profecto de causa magnus Aristoteles multiplices hominum mores ex aetate, dignitate, alijsque descripsit, quam ut id ipsum, de quo iam loquebamur, indicaret. Quod si quis illa, quae de varijs hominum institutis docuerunt Auctores, satis esse ad eloquentiam putauerit, se consilium magnorum virorum non assecutum ostendet. Primum namque non omnes hominum mores descripserunt, quales sunt illi, quae a regione, in qua quis natus, petuntur. Ut enim aliter Itali, aliter Germani, Galli aliter sapiunt, & inter ipsos Italos variae sunt pro diuersitate locorum

pro-

propensiones, ita variandam cum ipsis agendi rationē nullus omninò dubitauerit. Non igitur poterimus esse contenti ijs, quæ à dicendi Magistris hætenus tradita fuerunt. Præterea, ut fateamur lectionem librorum, utilem esse ad prudentiam, sine qua Eloquētia consistere nequit, consequendam, minimam tamen partem eorum, quibus opus est ad tantam rem, libris contineri, contendimus, & affirmamus. O paupertinam, o ieiunam, o trepidam, o intempestiuam eloquentiam, quam soli libri suppeditarunt. Ex solis libris qui sapiunt, iucunda quadam ratione desipiunt. Tollenda tandem de tabula manus, ponenda exemplaria, soluendum portu, ciuiles vndæ tentandæ. Plus enim prodest ad prudentiam, atq; adeò eloquentiam vnū exemplum, cuius tu pars fueris; quod videris, quam plurima, quæ dum velut sedula apis flores decerpis, comportasti. Iterum exclamo: o miseros, qui vitam transigunt nihil agendo, dum exempla colligunt agendi. Horum nomine studia literarum à civilibus ingenijs traducuntur, quasi homines ad vitam ciuilem non excitent, non in-

C struant,

struant, sed hebetes, & ineptos reddant. Homerus ut sapientiæ sic eloquentiæ communis parens duos memorat, quos præ oculis habeamus si sapienter diserti esse volumus, Nestorem & Vlysem. Ex illius ore melle dulcior oratio prodibat. Hic ad excidium Troianorum forte plus contulit lingua, quam Achilles gladio. Vtrumq; multiplici usu in vita ciuili fuisse instructum, animaduertimus, atq; adeò multum loquendo valuisse non miramur. Nestor tres ætates exegisse, hoc est ad nonagesimum ætatis annum pertigisse dicitur (ætas enim triginta annorum spatio à Veteribus circumscribebatur) senex, inquam, & canus fuit Nestor, quia non nisi multa rerum obseruatione ad sapientiæ, & eloquentiæ regiam peruenitur. Ut verò in Vlyse haberemus vitæ ciuilis perfectum exemplar, ut ab ipso disceremus, qua ratione hominum concilianda sit beneuolentia, pericula declinanda, hostium fraudes eludendæ, petulantia ingenia opprimenda, omnia deniq; agenda, ut per humanæ vitæ insidum mare rectum cursum tenentes, ad felicitatis portum pertingamus, ut vir tan-

tus nobis esset Magister ad sapientiam , & eloquentiam , integro poemate perscripta est fortunæ, quam ipsi contigit subire, varietas; quæ cum omnibus notissima sit, vos diutius non detineo , Auditores , vela orationis contraho, ad tuta silentij nauem subduco , & vobis, nisi maximè fallor, volentibus, & approbantibus; Eloquentiam consecuturo magna rerum cognitione, & multiplici vsu in vita ciuili opus esse pronuncio .

D E N O B I L I T A T E .

DECLAM. II.



Ophistarum mos est, quando de re aliqua suscipitur disputatio , vnũ amplecti, eiq; mordicus adherere, & cogitationem non extendere ad plura , quæ rem de qua agitur , constituunt. At qui grauius, & sapienter versantur in tractatione disciplinarum multa animo complectuntur , quorum facta inter se collatione, de tota materia pronunciant cum

C a fructu

fructu auditorum. Hoc omninò præscribendum mihi duxi de Nobilitate dissertationē habiturus. Non vnus apex ex hac re est arripiendus, & cum pertinacia retinendus, sed latitudo totius negotij aduocanda, vt hac ratione totum, de quo agitur, magis ac magis elucescat. Sed & illud, antequam de Nobilitate loquar, obseruari velim, longè aliter disputandum de ijs, quæ pendent ex instituto, voluntate, & opinione hominum, quàm fiat de ijs, quæ à natura ipsa absq; vlla varietate conformantur. Horum enim ratio longè certior, & quæ semper eodem modo habet; at institutorum humanorum fluxus desultorius, vagum est ingenium. Intendenda igitur acies est ad hanc varietatem, ne tempus & operam perdamus.

Breuiternunc indicabo, ad quæ nam sit respiciendū, quando de Nobilitate agimus. Fundamentum, cui tota moles Nobilitatis inædificatur, sunt res præclarè gestæ domi forisq; sed magis foris, & præsertim in bello. Nam ab initio, qui cum laude se gesserunt in administranda Republica, in defendendo populo ne à potentioribus opprimeretur, qui

qui iustitia floruerunt in asserendis legibus ,
 vtab omnibus obseruarentur, ad totius ciui-
 tatis salutem, & incolumitatem; qui operam
 dederunt, vt Ciues bene beateq; viuerent ;
 qui homines ab agresti vita deduxerunt ad
 cultum, ad elegantem , & homine dignam
 viuendi rationem; illis magni honores delati
 fuerunt , auctæ dignitates , consensu deniq;
 populi in magno splendore collocati. Sed lon-
 gè potior ratio Nobilitatis fuit à rebus præ-
 clare gestis in bello aduersus hostes, qui Ty-
 rannos oppresserunt , qui latrones domue-
 runt , qui seruitutem , paupertatem , & alia
 mala à ceruicibus ciuium depulerunt, illi &
 viui & mortui maximis honoribus ornati
 sunt. Imò antiquissimi mortalium beneficijs
 maximis affecti cœperunt huiusmodi mon-
 strorum domitores , quibus vitam , quibus
 incolumitatem debebant, tanquam deos co-
 lere , vt vel vnus Herculis exemplum satis
 superq; indicat. Hinc igitur colligo absq; re-
 bus præclare gestis vix reperiri nobilitatem, *Notand*
 aut si reperiatur , eam ad modum imperfectā *pro no*
 dici debere. Neq; aliquis dixerit illud dici *his*
 nobile, quod quomodocumq; inclarescit, &

venit in ora hominū. Nam quando Aristoteles Nobilitatē per *ἐν τῷ γένει* descripsit, nō existimavit statim illum esse & debere dici nobilem, qui quomodocumq; *γενέμενος* & notus sit. Alioqui ille, qui tribus ab hinc annis mortuus est Neapoli ditissimus, qui sordibus, & euclionea parsimonia maximam vim pecuniæ corraſerat, & ob eiusmodi sordes notissimus erat, vt propterea diceretur il gran Villano, fuisset nobilissimus.

Aristoteles verò voluit significare eum esse & dici nobilem & *γενέμενος*, qui rebus præclare gestis inclaruerit, non autem alia quacumq; ratione nomen consecutus fuerit. Quæret aliquis, an vt quis dicatur nobilis sufficiat, quod magnam nominis gloriam consecutus fuerit? Respondeo, qui res præclare gessit, & honoribus non est affectus, si strictè loquamur Nobilis non est, attamen quæ gessit fortiter æquiparantur cuicumq; nobilitati, quam quis consecutus fuerit ex rebus præclare quidem gestis, sed non tam magnis. Nam magna illa opinio, & constans sapientum virorum de alicuius virtute non minoris facienda est, quam Nobilitas.

Acce-

Accedo ad alterum, quod requiritur ad constituendam Nobilitatem, vt quis scilicet non solum res præclarè gerat, sed etiam honoribus afficiatur à Republica, vel Principe. Huc potissimum respiciunt Iurifconsulti, quando agunt de Nobilitate, vt scilicet aliquis acceperit priuilegia à Principe. Exemplo res erit clarior. in Germania exactissimè obseruantur familiæ nobiles. nam descriptæ sunt diligēter in monumētis Ciuitatum, & vt vocant, Circulorum. iam quot sunt in vrbi- bus imperij liberis insignes viri, qui prudentissimè administrant rem Ciuitatum, qui tamen nobiles non sunt, etiam si familia ipsorum antiqua sit? Nam non est recepta inter nobiles.

Non dissimili comparatione id ipsum probō. Sit aliquis natus ex antiqua, & illustri familia, qui tamen nauci sit homo, ineptus, aut vitij obnoxius, iste certè non potest dici non esse Nobilis. Nam natus est ex nobilissimis parentibus, diuitijs pollet, quæ duo, vtcunq; & qualemqualē constituunt nobilitatē. Iste tamē si rem ipsā spectes, quæ maximè pēdet ex opinione hominum, æquiparandus est
igno-

ignobilibus. Quid enim prodest huic homini nobilitas, si nihili sit, si contemnitur, si vocatur degener, & indignus maiorum suorum claritate? in hanc rem non pauca legimus apud Iuvenalē in Satyra aduersus iactatores nobilitatis. Hæc duo, quæ iam recensuimus, licet sufficere videantur, ut quis Nobilis sit, tamen quia satisfaciendum opinioni hominum, qui illos, qui recens emerferunt virtute sua, & magnas dignitates consecuti sunt, homines novos vocare solent, ideò ad Nobilitatem conficiendam accedat tertium necesse est, ut quis scilicet ex illis natus sit, qui res præclare gesserunt, & dignitates obtinuerunt. Itaque quia habenda est ratio communis opinionis hominum, sic statuendum; hominū nouorum, qui claros maiores non habuerunt, imperfectam esse nobilitatem. Hoc tertium, scilicet natiuitas ex claris parentibus tanti est, ubi de Nobilitate agitur, ut quando quaeritur quis sit Nobilis ferè respondeatur cum esse, qui natus est ex claris parentibus, qui claros habet maiores, & nobiles vocatur passim. hic iam video aliquem dicturum; si nobilitas est habere cla-

ros maiores, Princeps nulli poterit adimere nobilitatem; non enim potest efficere quò minus aliquis sit natus ex claris parentibus. Responsio facilis est. Nam ut quis sit Nobilis, & nobilitatis ipsius habeatur ratio, accedat auctoritas principis necesse est. Quid enim prodest habere claros maiores, si propterea quis excipitur ac ille, qui plebeios habuit? Verissimum est, vnum quodq; ita conseruari, ut acquisitum est, & vicissim per contraria illud ipsum amitti. Quia res præclare agendo aliquis inclaruit, & cœpit honorari, & recenferi inter procures, ita si quis aliquid indignū committat suo statu, si peccet in Principem, aut Rempublicam, poterit exui omnibus illis priuilegijs, quibus Nobiles præ plebeijs gaudent. Accedo ad quartum, & vltimum, ut opus sit diuitijs. ad tuendam namq; nobilitatem opus est splendore externo, opus est ita vitam traducere, ut in edibus, vestitu, victu, comitatu discrimen appareat inter, Nobilem, & plebeium opificem. At eiusmodi splendorem obtinere non possumus absq; diuitijs. Itaq; familiæ alioqui Nobiles dum ad paupertatem rediguntur, paulatim etiam,

D amitt.

amittunt Nobilitatem hinc videmus non
haberi rationem natalium in eo, qui iam vile
opificium exercet, aut alioqui incedit, ut
plebeius, & vitam tolerat tenui ratione: neq;
eiusmodi homines admittuntur ad dignitates,
quibus nobiles decorari solent. Repetimus
quod paulò ante dicebamus: acquiritur
nobilitas res præclare gerendo, obtinendo
dignitates, splendide viuendo, & eo modo,
quo uti solent Nobiles, seiuncti à vili plebe:
Ita quoq; si quis iam sordide viuat, & more
opificum, & opificum exerceat ob tenuitatem
fortune, ob paupertatem, sensim in ipso
extinguitur Nobilitas. Ut verò omnium rerum
est vicissitudo, ita familiarum quedam olim
clare obscurantur, & quæ erant obscure, in-
clarescunt.



D E I V B I L Æ O.
DECLAM. III.

Nunquam mihi illorum consuetudo potuit placere, qui quotiescunq; agitur de Ritu aliquo Ecclesiastico, eius statim originem ad Gentium instituta reuocant, aut Iudæorum. nam hac ratione præbetur ansa Nouatoribus nos irridendi, quasi fateamur mores Ecclesiasticos Christianorum initium suum debere non religiosæ prudentiæ, & diuinæ auctoritati, sed inuentis humanis, aut peti ex ea lege, quæ iam sublata est. Et quod nostra instituta non debeant referri ad Iudæos, vel gentes, illud suadere videtur, quod cæremoniæ Iudæorum adueniente Christo euauerint. nec enim umbræ, & tenebræ locum habere queunt, vbi sol vndiquaq; radios suos diffundit. At disertè testatur D. Paulus, legem fuisse umbram rerum futurarum. nec quicquam rerum sacrarum Gentibus imputandum est, quando pleraq; omnia, ex quibus

superstitio conflata est, incunabula sua debent Dæmonum suggestioni, vt cuilibet singula percurrenti liquere faciliè potest. Sic igitur censeamus; omnes res Ecclesiasticas originem suam duxisse ab auctoritate diuina, aut prudentia Præsulum religiosa. quod dum dicimus, non interim negamus eos, qui de Ritibus Ecclesiasticis differunt, posse in mediū ea proferre, quæ apud Iudæos viguerunt, & Gentes, vt ea occasione exerceatur eruditio, multiplex lectio ostendatur, ex varietate rerum voluptas audientibus, & legentibus adferatur, ex similitudine deniq; rerum, de quibus agitur, tota materia eleganter illustretur. Sic certè me gerere constitui in hac de Iubilæo dissertatione, dum solemne Christianorum hoc tempore institutū cum Iubilæo Iudæorum, cum ludis secularibus Romanorū conferam. non quod putem Bonifaciū Octauum rationem sacræ lætitiæ sumpsisse vel à Gentibus, vel à Iudæis, sed vt comparatio hæc nos per multiplicem temporum, & rerū notitiam deducat. primo itaq; aliquid dicam de Iubilæo Iudæorum, Secūdo de ludis Secularibus Romanorum; tertio deniq; aliquid

de

de Iubilæo nostro Christiano in mediū proferam. Annus Iubilæus apud hebræos dicebatur à labal, quod significat clangere. nam cum tubarum clangore promulgabatur, & denunciabatur solemne gaudium. hoc fiebat recurrente spatio quinquaginta annorū, elapso scilicet quadragesimo nono, in principio quinquagesimi, clangebant tuba, & dicebant Sacerdotes; adesse annū Iubilæum. in eiusmodi publico gaudio fiebat rerum in re publica Iudæorum non parua mutatio, quæ ad duo potissimum referri potest. nam omnes, qui erant serui, redibant ad libertatem. vnde colligere est obiter holam, æternum, apud hebræos non semper significare id, quod nullum habet finem. nam de seruo, qui nolit aſſeri in libertatē dicitur, quod auris perforāda sit ipsius, & sic seruiat in æternū. adueniente anno Iubilæo recurrebat libertas, & qui dixerat se seruum fore in æternum, non potuerat extēdere eiusmodi promissum vltra annum Iubilæum. Cæterum quæretis ex me, cur Deus potissimum voluerit intra eiusmodi spatium redire omnes ad libertatē? ad quam quidem quæſtionem sic respondendum

dum puto. quotquot erant in Republica Iudæorum ciues erant, & vt Scriptura loquitur, Fratres. hinc deus vetuit, ne quis foeneretur inter fratres, inter ciues, cum tamen liceret foenus exigere à Gentibus, & externis. quod si omnes Iudæi ciues erant, & socij in eadem Republica, repugnabat rationi ciuitatis vllum esse seruum. quia tamen multis de causis locum obtinuerat seruitus, vsus est hoc temperamento Deus, vt essent serui aliqui, sed vnusquisq; intra quinquaginta annos rediret ad libertatem, atq; adeò in tanta lætitia aboleretur omnis seruitus. cur autem locum haberet seruitutis conditio apud Iudæos, vt apud reliquas nationes, sunt istę quoq; causę. quia Moses voluit vnicuique licere seipsum vèdere. præterea fures, qui restituere nequirent, plectebat, & ad seruitutē redigebat. omitto alias causas. par autē erat, vt rediretur tandem ad libertatē ad seruanda iura ciuitatis, & Reipublicę Inter Romanos in bello ciuili ea de causā non fiebant serui, qui vincebantur, quia absurdum erat Romanos ciues fieri seruos. alteram causam, ob quā rediretur ad libertatem anno Iubilæo, illam

puto

puto etiam fuisse, quia seruitus contraria est naturę, vt rectè docent Iurisperiti. nam quod Aristoteles libro primo politicorum prolixè contendit seruitutem esse consentaneam naturę, id sic puto accipiendum, vt intelligamus non omnes natos esse eadem libertate, gradusq; in ea esse. hoc satis ostendunt exempla, quę afferuntur de foeminis, quę scilicet natę sunt parère, & de quibusdam hebetioribus, qui aptius obediunt, quam vt vel imperent alijs, vel sua sponte viuant. quod si istis exemplis adductis, Aristoteles velit probare, quosdam natura esse seruos ea seruitute, de qua loquuntur Iurisperiti, profectò inferendum esset fēminas esse seruas, & omnes eos, qui non sunt nati ad imperandum: aut regerendū erit, ista exempla, quę agunt de qualiquali subiectione nō debere extendi ad seruitutem, qua seruus ita subest domino tanquam instrumentum aliquod licet animatum. sed de seruitute nolo hic prolixius disputare. Tertia ratio soluendę seruitutis erat, ne confunderentur, & commiscerentur tribus, vnusquisq; igitur redibat ad eam familiam, vnde digressus fuerat. nam

rat. nam per seruitutem transibatur ab vna tribu in aliam, prout dominium ferebat. notissimum est, quam anxij essent Iudei in seruando ordine tribuum, vt propterea operosa commentatione conficerentur genealogie, quę à latinis vocantur stemmata. adeò autem eiusmodi labori addicti erant, vt Diuus Paulus, superuacaneas cum pleraq; iudicaret, monuerit discipulum, fugeret genealogias illas ~~iniquas~~, de quibus vix quicquam certum statui tandem posset. interim non improbat eas, si quis in illis non esset nimius. Transeo ad alteram mutationis partem, quę fiebat anno iubilęo. nam tunc omnia bona, quę dicuntur immobilia, redibant ad dominum suum. Itaq; in venditione agrorum sic se gerebant Iudei, vt venderet non tam agros, quàm fructus eorum annorum, qui elapsuri erant vsq; ad annum iubilęum. hoc duplici de causa fiebat. primum vt seruaretur equalitas. erat imperium Iudeorum non Monarchicum, vt disertè testatur Iosephus, & obseruat Sigonius de Republica hebreorum, presertim antequam Rex eligeretur, ego ne quidem absolutè Monarchicum fuisse puto.

post-

postquam Reges fuerunt instituti, cum satis constet qualis esset potestas regia. Si igitur Respublica erat, debebat in illa, quantum fieri poterat, seruari equalitas. in rebus publicis omnia referenda sunt ad equalitatem, & quicquid causa est inæqualitatis, suspectum esse debet. hæc causa est, propter quam ne quidē excellentem, & excedentem (ut sic dicam) virtutem ferre potuerint popularia imperia. amore etiam equalitatis nimio abreptus Plato omnia voluit esse communia in Republica. legislator Moses iussu Dei egregie consuluit æqualitati, vt interim habuerit rationē iustitiæ, quæ in distribuendo versatur, dum iussit ita vendi agros, vt tandem ad veterem dominum redirent. Sed præter æqualitatis rationem, ad reuersionem istam constitutendam motus est Moses, vt sartatecta maneret diuisio illa Palæstine, quæ placuit tribubus ab initio, cum regionem ingrederentur. non debebant igitur agri vni tribui attributi, transferri ad aliam. Hinc quæsitum est, an foemine possent viris nubere extra tribum, & videbatur id negandum, quia agrorum translatio non debebat fieri. responsum est, posse quidē

eas nubere , modò dotis instar aliud acciperent,quàm agros. habetis quæ mihi venerunt in mentē de anno *Iubilæo Iudeorum*. Transeo ad ludos *Sæculares Romanorum*. *Zosimus* putat institutos fuisse ad auertendam pestem ab Vrbe Roma. & peractis sacrificijs desisse sequi lue. affert idem carmina sibyllæ, quibus præscribebatur tota ratio celebrandi ludos illos. nec vllus putet, quia ludi sæculares dicti sunt, ideò recurrisse centesimo quoquo anno. nam sibylla disertè iubet celebrari postquam centum, & decem lapsi fuerint. decem igitur anni non obstiterunt, quò minus sæculares dicerentur. Idem *Zosimus*, quia addictissimus erat gentili superstitioni, conqueritur de omissione eiusmodi ludorū, & sacrificiorum. & putat ideò periisse rem romanam, quòd Romani desierint per eiusmodi ludos rogare deos pro incolumitate Romani Imperij. hæc enim præcipua erat causa, propter quam edebantur ludi, vt scilicet preces funderentur pro maiestate vrbis Romæ, vt numen perpetuas victorias largiretur. Cæterum si ideò periit imperium Romanum, quia ludi fuerunt omissi, quæro cur duraue-

rit

rit etiam sub Constantino, Iouiniano, Valentiniano, Theodosio ? præterea cur Iustinianus, quò nullus fuit magis alienus à superstitione gentium, tot victorias de barbaris reportauit, & Vandalos expulit Africa, Gothos Italia ? certè floruisse imperium Romanum tempore Iustiniani negare non possumus. & tamen tam diu antea òmissi fuerant ludi. In ludis illis recitabantur carmina quædam, & preces à pueris, & puellis patrimis, & matrimis. nam in templo aduerso ordine consistentes respondebant sibi inuicem. Cùm Augustus celebraret ludos, iussit Horatium carmen seculare conscribere, quod satis constat hac ratione fuisse recitatum. hæc ratio est, propter quam idem commendat poësin, quia scilicet poëtarum est conscribere carmina, quæ in laudem Deorum recitantur. vt verò omnes lubentius confluerent ad ludorum celebrationem, edicebatur ferè in hæc verba: *Venite ad ludos, quos nemo vestrum vidit, nec visurus est.* Heu fluxam humanæ vitæ breuitatem. hic mihi videor videre potentissimum Persarum Regem Xerxem flentem, cum conspiceret trecenta millia egre-

giorum militum. doluit post centum annos
nullum ex tot hominibus fore superstitem.
sed ad rem nostram redeo. Claudius Impe-
rator vano quodam gloriæ desiderio passus
est se abripi, vt non exactis centum & decem
annis, vt monebant carmina sibyllina, ludos
celebraret. nam excurrerant tantum sexa-
ginta quatuor anni, ex quo Augustus eos
ediderat. hunc errorem Claudij cum animad-
uertisset Domitianus, stato tempore eos re-
nouauit, & tunc in dignitate erat constitu-
tus Tacitus, vt de seipso testatur. Venio
ad vltimum, de quo dicere proposueram.
Anno trecentesimo post millesimum Boni-
facius Octauus, centesimum annum celebré
reddidit largiendo indulgentias (vt vtar vo-
cabulo Ecclesiastico) maximas adeuntibus
Basilicas Apostolorum. eum tamen annum
Iubilæum non vocauit. successor Bonifacij
Clemens sextus hoc nomine vsus est, credo
ea de causa, vt respiceret Iubilæum Iudeorū,
quo prefiguratus quodammodo fuisset no-
ster, vnde etiam quinquagesimum solemnē
voluit esse, nec existimauit ad alterum cente-
simum sacram liberalitatem differendam.

Sed

Sed quæretis an existimem Iubilæum nostrum præsignificatum fuisse à Mosaico? id enim videtur affirmandum, quandoquidem sic existimavit Clemens Sextus. Censuerim sic respondendum, figuram aliam esse generalem, aliam singularem: generali figura quicquid boni est in noua lege, præfiguratum fuit à veteris legis institutis. Et sic Mosaici anni læticia fuit signum omnium bonorum, quæ accepturi eramus per Christum, atq; adeò etià anni Iubilæi, cuius initium refertur ad Bonifacium. at si quæramus an singulari ratione, & propria annus ille Mosaicus significarit nostrum; videtur id negandum. nam cur vltus eius dilatus est ad annum vsq; millesimum trecentessimum? cur Christiani veteres non animaduernerunt eiusmodi significationem? Cur Bonifacius centesimum iussit esse lætium, non quinquagesimum? satis apparet Bonifacium vix cogitasse de Mosaico. sed rursus quæretis, cur figuram Clemens sextus potissimum ponit in quinquagesimo? Certè per eiusmodi numerum indicare, est singulari ratione significare, non tantum generali: Respondeo, Clementem sextum nixum fuisse generali.

rali ratione cum quadam similitudine singulari numeri quinquaginta annorū. Ceterum, ut ad consilium Bonifacij octaui reuertamur, quæstio est grauis, an vllæ essent per curriculum centum annorum indulgentiæ expositæ ijs, qui adirent Basilicas Apostolorum ante Bonifacij octaui tempora? id enim videtur negandum, quando tantæ rei altissimum est silentium in omni veteri historia Ecclesiastica. Inuolutus ne esset tenebris cōcursus mortalium Romam centesimo quoquo anno lætitiæ sacre causa? Incredibile id videtur. præterea Indulgentiæ illæ, quæ expositæ sunt inuisentibus Basilicas Apostolorum in vniuersum videntur ignotæ fuisse antiquis. quomodo igitur per recurrentia secula dabantur? addite, si veteri more centesimus quisq; annus sacer erat, cur Clemens ad quinquaginta rem totam deduxit? quæ quamuis sic proferantur, non est negandum, quod affirmat Bonifacius octauus, & multi alij, nimirum ex fama veteri constare magnas Indulgentias exponi inuisentibus Basilicas Apostolorum. aiunt etiam tempore Bonifacij adfuisse senem ex Gallia, qui testatus sit, au-

fit, audiuisse se ex patre suo, quod magnę Indulgentię dentur illis, qui quoquo centesimo anno Romā adeant. Solitos etiam Christianos itare ad Confessionem S. Petri, notissimum est ex Eusebio, Chrysostomo, alijsq; Indulgentiarum suum fuisse vsum in veteri Ecclesia iam pridem ostenderunt Catholici scriptores ex Tertulliano, Cypriano, alijsq; aduersus huius temporis Nouatores. fateor concursum mortalium non fuisse adeò solemnem, nec adeò notum, vt postea apparatus à Bonifacio octauo accepit. Pōtiffices aliquādiu abfuerunt Roma; exhausta est Italia bellis, & morbis. deuastata à colluie Barbarorum, & ad solitudinem prope redacta. Quid mirum si non ita fuit locus lætitię? Quod verò Clemens sextus ad quinquaginta annorū spatiū rem deduxit, imò Vrbani ab triginta tres, & tandem alij ad viginti quinque, id potuit fieri. nam cōsuetudinis sacrę ratio ea est, vt immutari possit, vt sexcentis exemplis ostendere possem. Et quis nescit etiam nonnulla, quę Apostolis in vſu erant, in quibusdā aliquatenus fuisse immutata? satis igitur fuerit nosse Indulgentias sacras ex perpetua Ecclesie con-

flæ consuetudine esse, rationem autem eas conferendi, non semper eodem modo obseruari. hæc ferè sunt, quæ in hac temporis angustia inciderunt in meam mentem. vos qualia cumq; sunt, ea boni, & æqui consulite.

DE CAUSIS RVINÆ
IMPERII ROMANI.
DECLAM. IV.



E causis, propter quas ruit imperium Romanum, mihi sermo erit, Auditores; sermo de re ardua, intricata, periculosa, sed voluptatis plena. Si tamen voluptas esse potest in eo, quod audiendum Romanorum Imperium, quod salutare erat humano generi, concidisse. Antequam ad enumerandas ipsas causas descendo, quædam mihi præmittenda, sine quibus in tota tractatione infeliciter versaremur.

I. Non vna causa singulatim destruxit, imperiū, sed plures iunctim. quod nisi obseruauerimus, facillimè oppugnabimur, quotie-

tiescunq; voluerimus indicare, quid fuerit illud per quod periit imperium. Ovidius ait:

Et quæ non profunt singula, multa iuvant.

Sic ego. *Et quæ nō obsunt singula, multa nocent.*

II. Causæ istæ non statim vim suam exeruerunt. nam tam vasta moles nō potuit de repente concidere. Itaq; non est negandum, hanc vel illam fuisse causam, quia ad ipsam, non subito secuta est ruina. antequam corruat domus, paulatim temporis iniuria, labefactantur fundamenta, columnæ debilitantur, imbres muros perpluunt, superuenit tandē magna vis ventorum, & sic domus corruit.

III. Coniunctio, & concursus tot causarum non fuit opus nec diligentiae, nec negligentiae humanæ. Clarius loquar. hæc vel illa causa singulatim potuit esse, & fuit ab hominum vel diligentia, vel negligētia. at quod tam multa conspirarint, hoc opus fuit causæ superioris, occultæ, cuius vim auertere nemo potest. hanc causam vulgus scriptorum, & sermo quotidianus fortunam voluit vocare. Petronius descripturus bella ciuilia Romanorum, & causam tot malorum, confugit ad hanc fortunam, quæ cum nollet ferre diu-

tius magnitudinem Romanam, euocauit ex inferis discordiam, quæ diuisit animos Cæsaris, & Pompeij. sic

Factum est in terris quicquid discordia iussit.

Nos causâ supremam, quæ nihil patitur esse perenne nullâ agnoscimus præter Deum. His præmissis accedo ad recensendas causas, quarum.

Primam fuisse siderum vim maleficam censuit Zosimus. Lucanus libro 1. de bello Pharsalico, vt doceat, vnde profecta sint bella ciuilia, tam multa scribit de sideribus. signa Veneris, & Iouis hebebant. Mars & Saturnus regnabant. Existimauit igitur Lucanus non absq; vi malefica siderum calamitates prouincijs immitti. Florimundus Remundus descripturus causas hæreseos lutheranæ ita ait fuisse cælum constitutum, vt sublecuturæ essent mutationes magnæ, & turbæ religionis causa. nam eodem tempore Ismaelem sophum Regem persarum innouasse in oriente in religione Mahometana. Vir doctissimus Landinus ad Dantē notat fieri mutationes rerum humanarū à fortuna ob stellarum influxū. hæc ille protulerit, qui putaret

ret non esse omnino absurdū, quod Zosimus causam ruine imperij Romani ait fuisse sidera. at ego non tanti fecerim ipsius iudiciū, vt pro siderum influxu velim pugnare.

II. Causa videtur fuisse dissidiū ob religionem. Certissimum enim est omnia imperia debilitari ob dissensiones intestinas. at nulla maior, & acerbior esse potest, quā quæ ob religionem oritur. Quot clades accepit Gallia à suis, tantum quia dissidebant in religione? neq; potuerunt quicquam gerere apud externos ea de causa. Heluetij formidabiles erant olim, sed postquam noua religio rempublicam illam inuasit scissis variè studiis diminuta est ipsorum potentia, & fortitudo. Inter Persas, & Turcas nunquam potuit conuenire ex quo cœperunt de Religione altercari. sic quiescit Europa ab armis Turcarum, quæ alioqui in tot bellis Christianorum Principum omnia possunt obruere. Quis neget factam fuisse magnam animorum diuisionem, postquam pluri susceperunt Religionem Christianā ob tot insignia miracula diuinitus edita? Hinc verò Gentes non poterāt adduci vt relinque-

rent patrios ritus, & mores in colendis dijs. sic certatum per tria ferè secula. cùm igitur dissiderent ab religionem, fiebat vt dissiderent etiam consilij in defendenda, & conseruanda maiestate Romana.

III. Habebant Romani ad ripas Rheni, & Danubij multas copias, quæ impedirèt, ne Barbari possent fluuios illos transire, & esse molesti Romanorum terris. nam Romani contenti erant illis, quæ hætenus occupauerant. neq; putabant esse operæpretium syluas, & casas barbarorum incolere. hæc causa fuit propter quã etiam Augustus restringere cogitauit imperium. nam quid proderat cõterere legiones in rebus nihili? placuit consilium Augusti Diocletiano, qui custodes posuit ad limites Barbarorũ, ne se effunderent. isti milites remoti sunt à Cõstantino, si credendum Zosimo. nam cũ Zosimus fuerit infensissimus memoriæ Magni Constantini non puto temere illi habendam fidem. ego refero quæ legi. vestrum erit singula expendere, & priuatim etiam mecum conferre. Sublatis istis (ut sic dicam) limitaneis militibus, non est mirum si Barbari coeperunt

excur-

excurrere in terras imperij Romani.

IV. Romanum imperium cœpit indigere ad bellum gerendū externis militibus, qui tandem illud ipsum imperium perdiderunt. Alexander Magnus in bello contra Darium, cum vidisset valde esse diminutum exercitū, iussit conscribi alios milites in græcia, quia externis non fidebat. in Hispania res Romana fuit adducta in magnum discrimen, quia plures erant Cantabri inter auxilia Romanorum, quam essent ipsimet Romani. notissimū est ijs, quibus notæ sunt historiæ, quod pleriq; omnes, qui in auxilium vocati sunt, tandem eos ipsos, quibus suppetias tulerant, aut subiugarunt, aut expulerunt. sic se gesserunt Normanni cum Græcis in Apulia, Calabria, Sicilia. Scio S. Augustinum referre ad gloriam Romani nominis, quod Gothi offerēt auxilia aduersus alios Barbaros. sed vicissim notum est illos ipsos Gothos auxiliares regnū condidisse in Italia, atq; adeò præcipuam prouinciam ab Imperio auulsisse. Si Romani eo numero, eo animorum ardore coluissent militiā, vt olim, non indignissent ope Barbarorum, atq; adeò non accepissent tandem

tandem ab illis ipsius leges.

V. Dixi superius disensionem ob religionem fuisse causam, ob quam rueret imperium Romanum, & locutus sum de dissidio inter gentes, & Christianos. nunc addendum quod postquam coepit ruere imperium, aut saltem postquam desijt habere tantum robur, superuenerunt dissidia inter ipsos Christianos. post mortem Constantini inter tres fratres diuisum est imperium, quorum Constantius fauebat Arrianis. Hoc negotium quot turbas dedit? præterea Romani vsi sunt opera Gothorum; at hi erant Arriani. Sic ubiq; & in ipsa Italia in singulis vrbibus dud erant Episcopi Catholicus vnus, Arrianus, alter. Cum imperator in oriente nollet ferre Arrianos, Theodoricus Rex Italiae Arrianus, dixit se Catholicos Italia exacturum. sic Imperator coactus est ferre Arrianos in Oriente, ne Catholici Italia pellerentur.

VI. Causa dicitur fuisse translatio sedis imperij Constantinopolim. sic censet I. Lipsius in libro de magnitudine Romana. & scio etiam ab alijs inter causas ruinæ Romani Imperij translationem hanc recenseri. Lipsius

pius simpliciter affirmat translationem fuisse causam propter quam ruit imperium. nobis indaganda est causa, propter quam ista translatio adeò obfuit. Debebat Romæ degere imperator, si volebat esse imperium. Romanum incolume. nam à Germanis imminabat potius calamitas, quàm à Parthis. salva Italia, & Roma facilè retundi poterant Parthi. procul erant. diuisi erant mari. non apti erant ad gerendum bellum in longinquis locis. pollebant tantum equitatu. non opus igitur erat imperatorem accedere propius ad eos reprimendos. At opus erat præsentia Imperatoris in Italia. quia Germani erant admodum vicini. innumeri erant. accerrimi erant. infensissimi Romanis ob memoriam rerum præteritarum. alliciebantur amœnitate regionis, cum septentrio suaderet migrare; loca frigida, & inculta relinquere. etiam ipsum cœlum Italię videbatur aptissimum proferendis hominibus aptis ad imperium, & militares labores, vt egregiè differit Vitruuius. Laude tamen non caret imperatoris pietas, si, quod aliquibus placet, ideò transtulit sedem imperij, vt cederet Pontifici

tifici Summo rerum sacrarum arbitro.

VII. Electione deferebatur imperium Romanum, quia opus erat homine, qui haberet magnum usum rerum, & militari laude esset insignis ad reprimendos tot hostes, ad continendas tot prouincias in officio. At post obitum Theodosij non simplici vice peccatū est diuisum est imperiū. at omnis diuisio debilitat vires. successerunt iuuenes, ne dicam, pueri qui, acceperunt Tutores, qui ipsi adspirabant ad imperiū. hinc bel-

la. hinc vocati Barbari. hinc

omnia sursum deorsum

versa. hæc habui,

quæ de causis

ruinæ

Romani Imperij

proferrem.



DE PRÆSIDIIS MEMORIÆ
DECLAM. V.

Memoriæ tantus est in re litteraria usus, vt maior fingi nequeat, Auditores. siue publice: siue priuatim in sermone familiari aliquid sit profectendum, à memoria id repetamus oportet. quæ si promptam se non præstiterit, omnem fructum studiorum nostrorum amitti existimamus. quid enim profuerit multa legisse, multa obseruasse, quibus tamen in rem aliorum, quâdo se obtulerit occasio, vt nequeas? tantum certè vnulquisq; videtur scire, quantum memoria tenere, re ipsa & manifestis argumentis deprehenditur. nam falluntur illi, & toto cœlo errant, qui tunc putant à se partes suas præclare impleri, quando sibi ipsis cecinerint, applauserint, & domi latendo, aut foris silendo, se multarum rerum cognitione esse instructos cogitauerint. At quid quæso aliorum interest, multane tibi sint lecta volumina nec ne, multane scriptitando corra-

G seris,

feris, quæ qualia sint, quamq; monetam tin-
niant, hætenus coguntur ignorare? Plane suf-
fenus sibi sit oportet ille, qui suorum labo-
rum testē vnicum putat esse debere conscien-
tiam. At sunt, qui memoria quando vident
se non valere, despondent animum, Musis si-
bi res suas habere iubent, libros alia supelle-
ctile commutant, quin ipsam horam, qua li-
teras cœperunt tractare, memoria refugiunt.
Ab his deplorari suam in studijs infelicitatē
audies, tantū vt temperent à lacrymis. Quid
quæso his, & illis faciemus Auditores? An li-
cebit vnis per nos esse securis, alteris tristi-
bus, & meticulosis? Absit hæc à nobis negli-
gentia, absit alienæ salutis contemptus. Qui-
nimò sic primos vellicabimus, vt secundos in
præsentem spem erigamus. id non aliter effi-
ciemus, quam si vobis fauentibus aliquid in
medium, de duplici memoriæ præsidio pro-
tulerimus. Et licet primum eiusmodi sit, vt,
si desit, diligentia hominum parari nequeat,
non tamen operæ amittamus pretium, si de
illo locuti fuerimus, vt vnūquisq; prius in
seipsum descendat, & quicquid est viriū ex-
plore, antequam de sua imbecillitate pro-
nuntiet.

nuntiet. Ita profectò est, Auditores, nihil vnaquam laude dignum præstiterit ille, qui naturam nõ habeat præeuntem, quã sequatur, à qua excitetur, prouocetur, quę vestigia figat. inuitam naturam quisquis in suam sententiã trahere nititur, si sibi semper redeuntem laborem in memoriam nobis reuocat. Primus hic est ad res præclarè gerendas gradus ingenij sui vim nosse ingenuam, nosse quò inuiteris, ducaris, & tantum non impellaris propensione suaui. Ex hac difficultate noscendi vires suas, quas natalis hora suffecit, quisquis eluctatus fuerit, ex alijs, quæ deinceps sequi solent, se posse euadere sibi spondeat audacter. Duplex igitur cum sit animæ vis, ad tractandas disciplinas quæ reddit aptos, ingenium scilicet, & memoria, duplex etiam esse disciplinarum genus ausim affirmare, ita tamen, vt cum sophistis, si qui sint, de hac re contentionis funem diu reciprocare nolum, nam crassa Minerva nonnulla quandoq; præsumimus, quæ utilitate non carere restandem ipsa docet. Est quædam studiorum ratio, in qua, vt sic dicam, vtramq; paginã implet aut Dei, aut sapientũ virorũ auctoritas,

aut etiā Principū iussa. In his recitare sententias, referre testimonia rem prope totā feliciter conficit. In quibus auctoritas rationem, non ratio auctoritatem metitur. Et vsurpare Pythagoricum: Ipse dixit, bona fide licet. nam quādo aut Numen, aut Numinis verissīma imago Princeps, aut sapiens loquitur, Quis dixerit, nosse iuuat, non quid dixerit laboriosa disquisitione rimari decet. at illa rerū cognitio, quæ causas expiscatur, quæ nihil admittit, quod ratiocinādo ita se habere non ostenderis, cuiuscunq; hominis licet potentissimi auctoritatem ignorat, nihil, quod ratio non extorserit, largitur. quod si prouidam rerum parentem in consilium vocemus naturam, ad prius disciplinarū genus memoriam, ad alterum ingeniū facere illicò pronuntiabit. nam vbi argumentationibus solis est locus relictus, vbi phalanx rationum, tanquam

pede pes, densq; viro vir

pugnāt, & locum tuetur, quis non animaduertat aptissimam esse mentis illum vigorem, quo præditi plurima in omnem partem excogitamus, in omnem formā nos vertimus,

timus, ad vtrumq; disputando parati? Hanc
 aciem qui non potest adferre ad concertatio-
 nes serias, rebus suis optimè consulat, si illa
 studia suscipiat excolenda, in quibus inge-
 niosæ subtilitatis non tanta habetur ratio.
 scimus, Auditores, & lubenter profitemur
 ad vtrumq; studiorū genus esse & ingenij, &
 memoriæ afferendum præsidium; at vicissim
 neminē putamus fore, qui neget memoriæ
 cum auctoritate, ingenio cum argumenta-
 tione melius, quā vice mutata conuenire.
 in sacris literis qui se excercēt, aut leges Ro-
 manorum qui interpretantur, ingenio indi-
 gere largimur, & qui philosophiæ incum-
 bunt, testimonio magnorum scriptorum de-
 ferre contendimus, quod memoria teneant;
 at illi tandē in auctoritate si conquiescunt, hi
 vel magni Stagiritæ effata examinare putant
 sibi licere. in ingressu ergo studiorum, Au-
 ditores, quid largiori manu nobi dederit na-
 tura exploremus ingenium ne, an memoriā,
 vt maiorem aptitudinem diuersitate studio-
 rum proposita adferamus ad illa, in quibus
 operam non perditum iri existimemus. vt
 verò ingenitam vim nouerimus, à Medico-

rum

Non Lxxv

rum filiis hoc discamus oportet. In quibus magnus est calor, & igneus vigor, illi acumine, & celeritate ingenij polleant necesse est. At quos fluxa humoris copia occupat, nec bona possunt esse memoria, nec ingenio. vt id quod inuenimus ipsi differendo, aut didicimus legendo, aut ab alijs audiuius, cōdamus feliciter, humor non minus calori respondeat opus est, vt alterutrius nimia copia obsit. nam nec arida valde quæ sunt figuras, facillè suscipiunt, nec quæ fluunt, quæ impressa fuerint, representant. Quid enim in aliquo ligno exucco, & ferè cinefacto effingemus? Et ridebimur si scribere in aqua fuerimus visi. Sic & vis excedens caloris, & fluens, & aquea cerebri conditio memoriam excludit. Sic senes, quod sicco sint capite, non recordantur. vicissim facile dediscimus, quæ pueri memoria mandauimus, quando in illa etate nimius est humor. sed dicetis, an igitur in senibus tantus est calor, quando obliuio eos subit illorum, quæ viri nouerant? Atqui confectis senio

Frigidus obsistit circum præcordia sanguis.
sed in promptu est responsio, Auditores. nam

in quibus humor, qui à Medicis radicalis vocatur, vocabulo si non adeò latino, at significantè clarè quod volunt, in quibus; inquam, humor, aut superatur, & exurit à calore, exigua memoria sint præditi necesse est; aut etiam in quibus consumptus est, & vt sic dicam, longo tempore decoctus (nam quis, nescit quod

Nascenies morimur, finisq; ab origine pendet?) vt in senibus, illi paucorum meminisse possunt. pro vt ergo vnusquisq; viderit se vel ad calorem, vel ad humorem accedere, ita de ingenij, & memorię modo poterit statuere, & consilium ad studiorum genus capere. euasi tandem ex molesta Medicorum semita, & ex diuerticulo in viam orationis regiam reuertor, adque præsidium memorię alterum accedo tractatione iucundius. Quotulquisq; enim est, cui natura adeò fuerit nouerca, vt si niti velit excolendo, quę accepit, mediocriter nõ sit profecturus, & eò, quò nunquam sperasset, peruenturus? Conatum humanorũ tanta est vis, vt plurima corrigamus, & in eos euadamus, qui nos ipsos vicisse, & supra omnem expectationem egregiè cum omniũ admiranda-

miratione dicamur. scio non omnibus licere, quod dicitur, Corinthū proficisci, at vicissim non ignoro virtuti, sollertię nullam viam esse inuiam, audacibus coeptis omnia impedimenta perrumpi, & ardua pertingi. sed propius accedo ad memorię adminiculum, quod ne vos diu morer, exercitationem appello, quæ quia multiplex est, quomodo nos in re tanti momēti gerere debeamus accipite: Auditores humanissimi: eo ordine, quem illud antiquorum fasceatim vobis pollicetur. An scriptio memoriæ sit utilis res non adeò est explorata. nam Druides non ferebant, vt versus quos tradebant ediscendos, literis mandarentur, ne diligentia in perdiscendo remitteretur. ergo quod audiuerant a magistris iuvenes, reuoluebant animo sæpius, vt firmiter animo hærent. at memoriam scribendo inuari, vsus docet, & exempla firmant insignium virorum, qui magnorum auctorum integra volumina transcripserunt, tantum vt memorię consulere. sunt etiam, qui putant plus memoriæ commodare vnā scriptiōem, quam decies repetitam lectionem. prudenter interim se gerbant Galli doctores.

res, quando scripta iuuenibus non trade-
 bant, ne quod semel chartæ credidissent,
 deinceps neglectum in tenebris iacere sine-
 rent. aliter de iuuenili ætate, aliter de con-
 sistente loquimur. nam viri non id habent
 otij, vt tempus memoriæ mandandis libris
 traducant. quinimò se commentatione, scri-
 ptione exerceant. dum insignia dicta claro-
 rum hominum suis dissertationibus inserūt,
 & non vno loco illustant & interpretantur,
 paulatim pleraq; ita habebunt familiaria, vt
 sponte sua sint præsto futura, quando vsus
 postulauerit. adolescentes autem, quorum
 ingenium nondum est par libris scribendis,
 quæ ab alijs cum orbe literario communica-
 ta sunt, sæpius repetant, & memori animo
 infigant. sed, vt ad scriptionem redeam, in-
 comparabilis vir Diuus Thomas Aquinas
 gloriabatur se duplici ratione pertigisse ad
 doctrinam, scribendo, & cum alijs differen-
 do. Annon ille Aristotelis scripta memori-
 ter referre, aut saltem ex illis multa potuisset
 depromere, qui diuini hominis omnia pro-
 pe monumenta commentarijs explanasset?
 Hospes scilicet fuisset in disputationibus.

Hipponēsis Antistitis, cuius testimonio suam
sententiam tertia quāq; pagina firmare con-
suevit? ignorasset diuina oracula, qui maxi-
mam operam in ipsis explicandis poluisset?
breuiter dicam: non poterit non plurima
recordari is, qui plurimis lumen scribendo
impartiri sategit. quod si commentatio-
nis in scribendo difficultatē causati fuerint,
quæram an tam arduum sit plurimum scripto-
rum dicta de eadem re inter se conferre? ha-
ctenus, vt eiusmodi collationes in tuo musæo
lateant, aut nonnisi vnius, atq; alterius ex
numero amicorum oculos subeant? nec res
tanta ingenij felicitate indiget, vt quis varias
obseruationes ad celebriores libros ex alio-
rum scriptorum non absimilibus locis mo-
liatur. quæ omnia mirum est, quantum rem
memoriæ sint prouectura. quod si remo-
retur diligentiam tuam in scriptione ea di-
ctorum varietas, præsidium ab eloquentia
petas fas erit. quid enim? an vt bona fide
in alicuius quæstionis disquisitione versari
censearis, totidem verbis repræsentandum
erit, quod ab aliquo scriptore pronunciatum
fuerit? recens hæc est literatorum supersti-
tio.

tio: recentium hominum vanissimus metus. si cum Veteribus, quos sapientes fuisse nemo it inficias, sapere volumus, rem ipsam tenere satis erit, modò suppetat id orationis lumen, quo in lucem eorum sententiam, insuper habitis verbis, proferre queamus. Veteres, quorum exemplaria ad nos peruenerunt, aut nunquam, aut rarissimè verba aliorum, occupant. & tamen frequenter ad Veterum auctoritatem tanquam ad sacram anchoram confugiunt. nonne Platoni cum sui seculi hominibus doctis res fuit, quorum libri in manibus erant? procul tamen fuit ab eo, ut assutis lacinijs purpuram suorum dialogorū oneraret. Aristoteles tribus verbis, quid alijs visum fuerit, docere fuit contentus. nam excerptare, certo ordine collocare aliorum dicta si laboris est, parum aut nihil habet ingenij. longè integrior est oratio, si ab vno parente accipiat pulchritudinis suæ naturalem splendorem. quid molestius est, quam per salebras diuersorum auctorum frangere gradum, huc illuc excurrando se defatigare? Epistolæ, opuscula Senecæ cum lego, cum Seneca magno philosopho, magno oratore me

loqui scio. luvat ab vnius ore pendere, non
 tot fragmenta variorum hominum collige-
 re. at quia de exercenda memoria sermo mi-
 hi est, Auditores, illud Pythagoricorum in-
 stitutum commendat Cicero, quod sub vesp-
 eram diligenter meditarentur, quæ inter-
 diu contigisset vel legere, vel disserere. vo-
 luptatis plenissimum opus, & exactæ dilige-
 tiæ certissimum argumentum post lapsum
 diei spatium a seipso rationem exigere, pen-
 sum repetere, quomodo transegeris tempus
 exquirere. nempe quod faciunt illi, qui in
 Religione progredi volunt, nobis imitan-
 dum, Auditores, in vita studiosa. ut luminæ
 somno antequam declinemus, quid præterio-
 ra die bene, quid secus egerimus, reuoluā-
 mus. illud vnum addendum puto, ne prolixi-
 tate molestiam pariam, ut lectio nostra non
 sit desultoria, non inconstans, non per omne
 genus librorum. scio delectari ingenium hu-
 manum varietate. at prudentis viri est tan-
 tisper tedium denotare, ut mansura & soli-
 da voluptas ad labores cōsequatur. exclamat
 Seneca, & ego cum tanto viro ingemino:

Non multa, sed multum. Aliquot præci-

puz

pux notæ scriptores qui nocturnas versauerit & diurna manu, illos qui fecerit suas delitias, cum quibus amet sentire, loqui, quos miretur, quos, quantum fas est, imitetur, à quorum sententia non discedere in animū induxerit, annon memoriæ quæ magis memoratū digna sunt, semper præstò habebit? Instar plurimorum orunt pauca, si sint rebus nostris idonea, si pro lubitū proferri à nobis queant.

DE TRIPlici CATENA

DE OCLAM. VI.



DE triplici catena mihi erit sermo, Auditores, isq; ut puto, non admodum expectatus. ea namq; coniungam catena dissertationis, quæ cui voluerim connectere si que-
ratis, nihil respondere potero, præterquam quod fortuitæ cogitationi indulserim. at si patiamini, catena vinctum ingenium ad egregia, & sublimia transferam, & quæ vos detineant nisi maximè fallor, cum magna volupta-

voluptate in medium adducam. De triplici catena loquar Homericam, Herculeam, & Paulinam. Homericam voco eam, quam nobis descripsit, & finxit magnus Homerus. Dicit namq; quod Iupiter vinxerat omnes deos, & deas, eosq; ita vinctos catena aurea suspensos tenebat in aere, adeo vt absq; nutu suo nihil possent moliri. quid per eiusmodi narrationem sibi voluerit poeta, vt explicetur; varia possunt dici. & quidem quandoquidem stella Iouis illa est, quæ hominum animos facit aptos ad conciliandam aliorum beneuolentiam, ad incundas amicitias, ad humanitatis officia præstanda, rectissime dixerimus per auream catenam significatam vim illam suauissimam, qua homines seinuicem benefaciendo deuinciunt. quod si regeratis, querendo cur Homerus deos, & deas dixerit fuisse vinctos, non verò homines, promptum erit respondere, quod homines mutua beneuolentia coniuncti optimè dij vocentur. nulla namq; re propius acceditur ad diuinitatem, quam de alijs benemerendo. Illi profectò qui antiquissimis temporibus obtinuerunt diuinos honores fuerunt homines,

qui omnium animos ope beneficiorum sibi
 alligare fategerunt : at cur fingit Homerus
 istos vinctos catena fuisse suspensos in aere ?
 & pendulos per inania detentos ? cui quidē
 interrogationi sic puto satisfaciendum , vt
 existimem voluisse Poetam per eiusmodi su-
 spensionem in aere indicare homines beni-
 gnitate præstantes iam non humi reperere , sed
 surgere supra humanam conditionē , & gau-
 dere cœlestibus auris . & dicuntur illi pen-
 duli hæere cœlitus vincti , quia beneficen-
 tiæ qui studet , diuina quadam ratione ad id
 præstandum monetur . nec enim , vllō com-
 modo humano impellitur , sed solo virtutis
 diuino amore . scit namq; se natum , vt cœ-
 lum patriam suam esse meminerit . illius cau-
 sa in perpetua cogitatione , de alijs sibi ad-
 stringendis versatur . sed videamus an aliter
 explicari , & enodari possit catena aurea Ho-
 meri . illud non absurdum fuerit dicere nihil
 esse aliud istam catenam , quam connexionē
 omnium causarum à causa prima . & ipsi poe-
 tæ summi Dei vim agnouerunt in producē-
 da , & conseruanda hac rerum vniuersitate .
 Orpheus ex eorum numero , qui Theologis
 dice-

dicebantur, id testatus est, quod scilicet deus
hæc omnia effecerit. Homerus Iouem, pa-
trem deorum, & hominum; Virgilius, diuum
patrem, atq; hominum regem appellarunt.
quod si dicatis etiam Oceanum ab eodem
Homero vocatum fuisse deorum, & deorum
patrem, quia aqua sit principium omnium
rerum, vt docuit Thales, id sic explicabimus,
vt Homeri essatum ex ipsis sacris literis ali-
quo modo repetamus, quod scilicet cum ab
initio creata esset aqua, ex illa deinceps pul-
cherrima mundi machina, quam admiramur,
à Deo fuerit constructa. ideo enim spiritus
Domini ferebatur super aquas, vt eas partim
densando, partim dilatando, & extenuando,
construeret mundum. Ea est causa, quod ab
Ouidio Deus *mundi melioris origo*, fuerit ap-
pellatus, quia cum primum nonnisi moles
tota obruta aquis ab ipso fuisset producta,
deinceps vetuit in ea confusione manere ma-
teriam. sed ne diutius euagemur, non solum
dicitur Iupiter à poetis causa omnium rerum,
sed pronunciant illius ipsius potentia omnia
conseruari, & operari. quod si vel ad momē-
tum auerteret nutum suum, iam omnia in anti-
quum

quism chaos relaberentur. quoties igitur
apud poetas Dij, & Dæ aliquid aggredi vo-
lunt, vocatur Concilium à Ioue, ille iubet cō-
ticelcere omnes, ille loquitur, ille tandem sua
sententia finem imponit conuentui. quid
igitur miramur, si omnes dij, & dæ catena
deuincti in aere pendent ex nutu Iouis? qui si
non influeret, si non dirigeret, ne quidem
digitum extendere possent? res verò omnes,
& causæ secundæ deorum, & dearum nomi-
ne veniunt, apud Gentiles quia velut riuus
fuit ex magno Oceano diuinitatis, at grauif-
simè lapsi sunt, quando eò deuenerunt, vt cū
causis secundis notam primæ communicarēt,
& plures deos adorarent. nos verò illustrati
lumine diuino Religionis enim D. Paulo di-
cimus *in Deo sumus, viuimus, & mouemur. &
Dei genus sumus*: quod dicimus, non solum
quia immortalī anima præditi sumus, sed
etiam, quia aliquid sumus à Deo productum.
quod enim est, id cum Deum suo modo re-
ferat, Deus aliquatenus est. quod à deo est
profectum, id diuinum cur negemus esse,
atq; adeo deum? nam quis nescit longè in-
feriori significatu communicari diuinitatis

nomen etiam alijs præterquam summo Deo
pergimus, & dicimus omnium causarum,
excepta prima, vires esse constrictas, & liga-
tas, adeò vt vim suam exerere nequeant nisi
operante, mouente, annuente prima causa.
sic igitur catena aurea Homeri nobis osten-
dit verissimum esse, quod in scholis philoso-
phorum, & Theologorum repetitum est nõ
oratorijs, sed pressis verbis: nullum quod est
in potentia potest seipsum reducere in actum,
omnis causa secunda est in potentia, & debet
reduci in actum ab aliqua causa, quæ sit in
actu. vna tantum est causa, quæ semper est in
actu, scilicet prima. quod omnes causæ se-
cundæ applicantur à causa prima ad operan-
dum. Hoc, inquam, elegantissimè per cate-
nam voluit nobis ob oculos ponere Home-
rus: sed cur catena hæc aurea vocatur? planè,
vt discamus verissimum esse, quod à Theo-
logis Christianis proditum est: quod scilicet
causa prima, dum reducit ad actum causas
secundas, id facit suauiter, prout scilicet con-
ditio earum requirit; efficit, vt causæ natu-
rales operentur secundum naturam, libe-
ræ vicissim cum libertate agant. hoc mirum
est,

est, quod influxus ille primæ causæ non in-
uertit, nō perimit vim secundarum causarū,
sed suauissimè promouet. at, inquietis, vo-
luntas nostra libera cum sit, atq; adeò possit
pro lubitu quocumq; ferri, quomodo dicitur
teneri vincta adminiculo catenæ aureæ? cer-
tè nihil magis repugnare videtur libertati,
quam ita detineri vinculis, vt non liceat pro-
gredi quò placuerit. sed, auditores, difficul-
tatis plenum opus aggredèrer, si inuolutissi-
mam quæstionem enodandam suscipere. ve-
tus est controuersia non solum inter Chri-
stianos, sed etiam gentiles. nos quibus af-
fuit lumen diuinitus, nouimus libertate
voluntatis præditum esse hominem, noui-
mus etiam ita moueri voluntatem humanā
à Deo, vt voluntas à Deo, non Deus à volun-
tate pendeat, nouimus per diuinam motio-
nem non everti voluntatis libertatem. sci-
mus rebus diuinis plurimum inesse obscu-
ritatis, & in earum tractatione nō nitendum
ingenij subtilitate, sed diuina auctoritate.
neq; à mysticis effatis vel latum vnguem ef-
se discedendum, etiam si non possimus satis-
facere omnibus, qui otio abundantes multis

interrogatiunculis diligentiam nostrā exercere amant. sed iam satis verborum de Catena HomERICA. Accedo ad Herculeam, cum qua pictum nouimus non quemlibet Herculem, sed Gallicum. scitis recenseri plures Hercules; at nobis de Gallico sermo est, quando catenam memoramus. is à fortissima & eruditissima gente ita colebatur, vt diceretur catena quadam ab ore per posticam capitis partem prodeunte trahere vinctos innumeros mortales. monstri plenum spectaculum videtur ignaris. si namq; Hercules robustissimus corpori circundans catenam, aut manibus tenens duceret, aut etiam traheret aliquam multos homines, res absq; magna difficultate inueniret fidem. at quod exiens ex ore retro acta catena id faciat, id verò prope ridiculum videtur. nam quæ vis potest esse in ore, in capite hominis, vt ligatos rapiat plurimos homines? Sed admirationem augeat, quod catena constricti hilares, exultant, ala critatis pleni, sequuntur. Quis nescit, quod qui rapiuntur ligati, sequuntur trepidi, pallidi, mœroris pleni, squallentes, deiectis oculis? sæpe debent increpari, vt sequan-

tur: multi lacrymas fundunt, & totius corporis habitu indicant, quam sibi sit molestū in vinculis trahi. recurramus, auditores, cogitatione ad vim eloquentiæ, ad impetum orationis, quam non sine summa ratione flexanimam vocauit Cicero. coluerunt aliquæ nationes Herculem cum claua, quod ea armatus obeundo regiones monstra domuisset. at mihi videntur longè melius Galli sensisse de Hercule, quando ob potentissimā eloquentiam eum sunt venerati. claua effera quandam vim nobis spectandam proponit. at catena trahens innumeros homines, vt lubenter sequantur, ad humanum ingenium magis facit, quod cogi non vult, sed ratione persuaderi. in societate ciuili illa pulcherrima est victoria. ita differere, vt aduersarium audientem cogas dare manus. oratio, Auditores, vinculum est humanæ societatis. oratio ita propria est hominis, vt ratio. tolle orationem, & vix discrimen inter hominem, & bellinā constitues. nam quid quæso prodesset ratione multa inuenire, si tamen ea cum alijs non posses communicare? oratione qui pollet, semper plurimum in ciui-

tatibus poterit. hanc qui negliget, contemptum effugere nesciet. ò magnā desidiā eorum, qui cum homines sint, & videri velint, de oratione tamen nihil sunt solliciti. excutiant veternum, nescant quam sibi patiuntur elabi occasionem proficiendi, dum iuuenilis ardor ad eloquentiam excitat. nam quando

Frigidus obstitit circum præcordia sanguis,
frustra Herculem Gallicum, ut eloquentiam largiatur, inuocabunt. ne verò tam salutare monitū effluat ex animis, circumferant quæso perpetua cogitatione catenam Herculeā, aut saltem quoties Herculis continget fieri mentio, reuocent sibi in mentem, quanta sit vis orationis, ut scilicet ita moderetur hominibus, ac si vinculis constrictos tanquam captiuos quocumq; velit eos trahere possit. sed tempus est, ut Paulinam catenam, Homerica, & Herculeā longè præstantiorem contēplemur. istam enim uero cœlitus dimissam scimus, non tam ad alligandos homines in societate ciuili inter se, aut oratione vinciendos, quam aureis vinculis circumdatos feliciter tandem ad cœlestem societatem transferendos. Paulinam catenam vocamus,
quia

quia Paulus gentium Doctor, paucis verbis, quando epistolam exarauit ad Romanos, descripsit diuinæ prædestinationis colligatam seriem, dum ait: *Quos præcognouit eos prædestinauit, quos prædestinauit eos vocauit, quos vocauit eos iustificauit, quos iustificauit, eos glorificauit.* Hac catena. Deus quosdā, traducit vt peringat ab extremo in extremū. neq; vlla vis poterit vllum annulum huius catenæ confringere. sed hoc ante omnia sciamus oportet, quod nō omnes hac catena sibi deuinciēdos existimat Deus. *Quos enim præcognouit, eos tandem etiam gloria decoros voluit esse.* & numerum quidem eorum exiguum dixit esse ante Paulum Christus, quando pronuntiavit. *Multis vocati, pauci electi.* quis quæso obloquatur deo, quod paucos catena vinctos trahat post odorem vnguentorum? quis ipsi potest dicere: *Cur ita facis? Quis prior dedisti, ei, vt retribueretur ei?* Nonne ex ipso, in ipso, per ipsum sunt omnia? nempe diuina arcana non patiuntur se sub examen humanū reuocari, tunc plurimum de diuinis sciemus, quando ignorantiam fassi illā venerabundi adoraueamus. liberè pronuncio: Theologiam euer-

tit,

tit, quisquis eam sui ingenij modo metiri
 vult. oracula diuina non ratio, sed hanc illa
 moderantur. in rebus friuolis exultant illi,
 qui res Ecclesiasticas professi nobis commen-
 dant recentia quædam inuenta, quæ scilicet
 diligentissimos, & sapientissimos homines
 effugerint. catenam verò Paulinam dum
 memoramus, hoc à præceptore omnium
 Theologorum discimus ita paucos illos mor-
 tales trahi vinctos, vt nullus hostis, quisquis
 ille sit eos possit ex manibus dei rapere in
 exitium. Nam si eos præcognouit, hoc est no-
 uit tanquam suos, & amauit præ alijs, nouit,
 inquam, vt cum Theologis loquar, notitia
 approbationis. si quos nouit ita deduxit per
 illa, quibus absq; dubio, æternam salutem li-
 cet consequi, vt tandem beatos esse iusserit,
 quis non videt perire non posse? Exclamat
 itaq; audacter Paulus cum diuina catena tra-
 heretur: *Quis nos separabit à dilectione Dei?*
 Nolim verò, auditores, vos offendi, quando
 de rebus diuinis agentes vtimur nominibus
 catenæ, & tractionis. nam iucundissima
 vis per eiusmodi vocabula significatur, neq;
 vis existimetur esse, quæ nolentes impellat.

& re-

luctantes adigat. Absit à diuina benignitate
 violentia, absit coactio. quin potius ita illa-
 bitur animis nostris, vt quia aliquos elegit
 ante iacta mundi fundamenta, sanctos, & in-
 culpatos efficiat. non enim, vt sapienter ob-
 seruauit S. Augustinus, quia eramus sancti &
 inculpati, elegit nos. absit vt in catena Pauli-
 na dicatur primus annulus esse nostra sancti-
 tas. nam disertè primum dixit Paulus, Dei
 electionem, vt sanctitas post annulum voca-
 tionis pendeat. rursus dico, auditores, hæc
 vocabula catena, tractio, vis, explicanda sunt
 ex istis: *Trahit sua quemq; voluptas.* quia
 nempe allicit suauissimè. *Cum exaltatus fue-
 ro, omnia ad me traham,* inquit Christus. &
 alibi. *Nemo venit ad filium, nisi pater traxerit
 eum.* alibi ait, quod ita tractos nemo poterit ra-
 pere ex manibus suis. in Cantico Canticorum
 nomine omnium eorum, qui trahuntur cla-
 mat Sponsa: *trabe me post te, curremus in odo-
 rem unguentorum tuorum.* Trahuntur verò fu-
 niculis Adam, & vinculis charitatis, vt Deus
 loquitur. trahit Deus alliciendo beneficijs,
 extendendo brachia sua totam diem ad po-
 pulum. conuocando, quemadmodum galli-

na conuocat pullos suos, sed & interius illa-
bendo, & mouendo. Nam frustra externa ad-
hiberentur, nisi occulta ratione moueretur
voluntas. de quibus omnibus, ita semper lo-
quendum est, vt scitatecta maneat humani
arbitrij libertas.

**DE AUGMENTO MAGNORVM
IMPERIORVM. DECL. VII.**



Qui feliciter vult versari in le-
ctione historiarū, debet ob-
seruare modos, quibus ma-
gna imperia magis ac magis
augentur, & extenduntur.
Ego in gratiam studiosorū
aliquos hic enumerabo, & quidem nisi fal-
lor, præcipuos.

I. Qui debiliores sunt, & sibi singulatim
metunt à potentiore, solent inire foedus ad
mutuam defensionem. sic in Italia cum vi-
derentur Veneti velle totā regionem in suā
potestatem redigere, minores qui erant Princi-
pes se foedere iunxerunt. quod si geratur bel-
lum, & potentior obtineat victoriam, facile
dein-

deinceps singulos opprimeret tamquam hostes,
 propterea quod suppetias tulerint. sic Pom-
 peius redegit in suam potestatem Armeniam
 pulso Tigrañe, propterea quod à partibus
 Mithradatis steterat aduersus Romanos. Et
 multa alia regna Romanis subiecit Pompe-
 ius, propterea quod conspirassent cum Mi-
 thradate. sic Græta subjugata est. sic Dux Me-
 galopolitanus exutus fuit Principatu, quia
 idcirco fuit Regis Damæ aduersus Imperato-
 rem Ferdinandum Secundum. *1611. 1612. 1613.*
 227 *1614.* In Turcia aliquot abhinc annos habe-
 bant bellum educendi altero quoque anno
 exercitum, nec corporis, sed labores militares
 dedissent ad eiusmodi exertitationem quo-
 rendus erat hostis, ille vero censebatur is, qui
 opportunius poterat oppugnari, sic igitur
 Solimanus, toties duxit in trucidissimas co-
 pias in Pannoniam, & longe lateq; regionem
 devastauit, varia prætexebant, sed inter il-
 la erat abq; dubio hæc etiam causa, se non
 præcipua, nec ob id torpescerent milites. *1611.*
 228 *1612.* Magnis imperijs videntur mul-
 ta subtrahant. Quicquid enim magni Reges
 non possident, hoc videntur amittere. Turca-

rum imperator non semel mouit bellum aduersus Venetos, quia dicebat suas esse insulas in mari mediterraneo, quæ ab ipsis detinerentur. se namq; successorem esse magni Constantini, ac proinde dominum esse omnium eorum, quæ quondam fuerunt imperij Romani. Dicit igitur velle se recuperare amissam. Hoc colore contra quem quæso non potest arma sumere?

I V. Multa acquirunt magni Reges, dum debilioribus, & ad se confugientibus suppétias ferunt. Nam videtur omnino res sancta oppressos subleuare: & interest dignitatis, ne illi, qui magnis Regibus causam suam commendauerunt, principatu exuantur. Interim fit, ut ob magnos sumptus factos aliquid iuris acquiratur illi, qui auxilio fuit. præterea videtur consultum, ut magnus rex detineat propugnacula, ne ab hostibus occupentur. sic paulatim regio venit in potestatem eius, qui tulit suppétias: sæpe contingit mori eum, aut occidi in bello, cui suppétie late sunt; quis tunc ei succedet? certè magnus ille princeps, qui ipsius causam defenderat, & defendendo plurimos sumptus fecerat. sic

insubria venit in ditionem Hispanorū, quia primum auxilio fuerunt Sfortijs, quibus tandem extinctis Carolus Quintus Regno Hispaniæ adscripsit prouinciam. causa sumptuū Heluetij Bellinzonam, Lucanum, Lucarnum, & alia oppida insubriæ occuparunt. Quamuis autem Heluetij non sint inter magnos Principes recensendi, ex hoc tamen exemplo id ostenditur, quod supra dicebamus.

V. Magni Reges abundant pecunia. sæpe fit, vt minores ea magnopere indigeant. hinc magnis principibus traduntur oppida detinenda donec restituantur mutuo data. cū vrbes Sueuiæ magnos sumptus fecissent in expellendo Duce VVirtemberge, qui tyrannicè se gerebat, regionem illam vendiderunt Carolo Quinto, qui eam ita tandem restituit Duci, vt successores nunc etiam domus Austriacæ dicantur esse beneficiarij.

VI. Magni Principes sæpe obtendunt trāsitum per aliquam regionem, qui si denegetur, aiunt iam sibi iustam esse causam bellum inferendi, propterea quod ius gentium violetur eiusmodi denegatione. Nam etiam Moses oppugnauit Amalechitas propterea, quod

quod noluisse ferre, ut ipse transiret per eam
regionem ingressurus Palæstinam.

V I I. Sæpe obtendunt magni principes,
quod Reguli peccarint, crimine perfidiæ,
se polluerint & assentiuntur delatoribus, ut
si in ipsos animaduertant, excusentur ab omni-
bus, propterea quod grauius crimina obie-
cta fuerint. quando namq; obiectum est cri-
men viri quamuis innocentissimo, semper
manet suspicio quædam, neq; vulgus potest
certo statuere eum, qui acculatur, esse inno-
centem. sic duces Caroli Quinti tanquam
perduelles detulerunt Franciscum, Stortiam,
hinc occupata regio, & non sine maxima dif-
ficultate rogantibus principibus, Carolus
Quintus ei veniam dedit. hinc aiunt etiam
circumuentum calumnijs Petrum Ludouici
Farnesium apud eundem imperatorem.
Folietta nihil certi contra ipsum ait ab ad-
uersarijs prolatum.

V I I I. Magni Principes etiam au-
gent Imperium, dum animaduertunt in per-
duelles, qui deficiunt, & arma sumunt. Nam
paucissimæ rebelliones felicem exitum ha-
bent. sic exiuntur regionibus rebelles iusto

supplicio. sic Romani auxerunt imperium: quando occupabant regna non statim remouebant reges. Pompeius reliquit Regem Iudææ, Armeniæ, aliisque regionibus. sic Ægyptij non statim atq; in potestatem Romanorum venit regnum, desierunt habere Reges. sed quia subsecutis temporibus contigit, vt Reges multa moliti fuerint aduersus Romanum imperium, hinc factum est, vt ipsis abstulerint regnum, & regna quæ hætenus fuerant, prouincias effecerint. Armeniæ Regem reliquit Tigranē Pompeius. sed quia populi illi sæpe fuerunt infidi, Traianus tandem Armeniam in prouinciam redegit. conspirauit cum Antonio regina Cleopatra, Augustus bello Actiaco victor Ægyptum prouinciam fecit. sic etiam iudæi itidem desierunt habere suos Reges, postquam sæpius tumultuati fuissent aduersus Romanos. & Solimannus in Pannonia primum voluit esse regem, quem defendit aduersus Ferdinandum Austriacum, tandem cum multos sumptus fecisset, & sæpius venisset in eam regionem, iussit vt in posterum Pannonia pareret Bassæ Budensi.

DE TRIPLICI MUTATIONE
RERVM ROMANARVM.
DECLAM. VIII.



IN rebus humanis nihil reperi-
ri, quod multiplici muta-
tioni non sit obnoxium, tā
notum est, vt notius esse ne-
queat. ipsorum imperiorū,
quibus nihil videtur ma-
ius, & potentius, sunt vagi circuitus. Exem-
plo sit omnium imperiorum celeberrimum,
res Romana. quoties concussa est, quoties
ferè destructa, quoties vires resumpsit? Nunc
floruit, viguit, mox ad angustias redacta, do-
nec tandem propè euanuerit. Huius Rei cū
multæ possint recenseri mutationes, tres ta-
men videntur mihi præ reliquis memoran-
dæ. prima fuerit, quando eiectis Regibus in-
stitutus est consulatus à Bruto. Altera quan-
do libertas Reipublicæ est oppressa à Iulio
Cæsare tertia & vltima, quando imperij se-
des translata est Constantinopolim. De tri-
plici hac mutatione si breuiter locutus fue-

ro non parum prodero illis, qui audituri sunt prælectiones nostras in Tacitum. etsi enim & prima & ultima mutationes non videantur magnopere facere ad Cornelium, tamē quia decet eos, qui de rebus Romanis, quas tradit idem scriptor, loqui volunt, tres istas mutationes notas habere, ideò vos rogo etiam atque etiā, ut mihi beneuolas aures porrigatis. De prima, ut loquar, non opus est, ut prolixè vobis in mentem renocem, qua de causa Romani instigante, & præiunte Bruto insurrexerint aduersus Tarquinium, illum expulerint, ad libertatem concurrerint. cui enim hæc audita non sunt? hoc satius fuerit obferuare, Regum apud Romanos non fuisse absolutam potestatem. quod vel ex eo manifeste constare potest, quia Reges à Romanis eligebantur. nostis qua ratione ad regnum fuerit promotus Numa?

Curibus paruis & paupere terra

Missus in imperium magnum

inquit Virgilius. quia ob pietatem & iustitiam magnam famam cōsecutus fuerat, ideò visus est Romanis dignissimus, qui vocaretur ad sceptrum. iam satis constat, qualis sit

L con-

conditio regum, qui electione regnum con-
 sequuntur, ut non habeant arbitrium omnium
 rerum, & pro lubitu omnia possint gerere. ad
 conditiones adiguntur, qui hac ratione præ-
 ficiuntur, quas si ipsi neglexerint, vix quic-
 quam certi sibi possunt de voluntate aliorum
 polliceri. Romanus populus, etiam quando
 regibus parebat, ferebat leges, alias antiqua-
 bat. Regis auctoritas magna erat in gerendo
 bello. pacis tempore non admodum latè pa-
 tebat ipsius potestas, tantum abest, ut esset im-
 mensa. sed iam ad rem nostram accedo. abu-
 sus est potestate regia Tarquinius dum pri-
 marie nobilitatis femine Lucretiae vim in-
 tulit. Hoc etiam ipsius perniciosissimum erat
 consilium, ut è medio tolleret præstantissimos,
 & virtute maxime conspicuos, ut deinceps
 reliquis velut mancipijs imperaret. nam
 proprium est barbarorum Regum, ut subditis
 non minus, quam feruis iugum imponant,
 non autem tanquam liberis hominibus præ-
 sint. hinc igitur ad iustissimam indignatio-
 nem movit populum, ut formam regiminis
 immutaret. cæterum non sine ratione videor
 mihi posse dicere non factam tunc tantam
 muta-

mutationem, quanta possit alicui videri. sublata est auctoritas Regia, hoc fateor, reiectū Regis nomen, vt in posterum illa dignitas semper pessimè audiuerit, & ne tunc quid recepta, si nomen spectes, quando euersa libertate omnia vnus voluntati fuerunt transcripta. mansit autem, si rem cernimus, potestas emittens, & prope, vt vtat verbo recepto, monarchica. hic video statim aliquem dicturū. Monarchia est vnus imperium, & Regia potestas vnus est non plurium at sublata regia auctoritate consulatus fuit institutus, quæ dignitas duorum erat, non vnus. sed non difficile fuerit occurrere eiusmodi obiectioni. præmitto tamen non debere videri mirum dictū, quod dixerim vix immutatam fuisse monarchiam, nam Polybius v. i. histor. vt ostendat regimen reipublicæ fuisse mixtum ex monarchia, Aristocratia, & Democratia, ait auctoritatem Consulū fuisse prope regiam. si plures consules fuissent instituti, magis discessum fuisset ab vnus imperio, verum duo tantum dicuntur consules, qui res præsertim bellicas auctoritate, prope Regia dixerim, administrabant. nam quando pro-

dabant in expeditionem aliquam, per vices habebat alteruter eorum absolutam potestatem, quomodocumq; rem administrandi. Itaq; vnaquaq; die salus totius reipublicæ in vnius voluntate posita erat. At auctoritas Regia præterquam in bello non tanta erat. cæterum ad hanc mutationem consecutum est incredibile in animis Romanorum desiderium bene de reipublica merendi. quandoquidem rem fortiter gerendo, & virtuti dando operam populi applausum obtinebant, à quo suffragijs ad insignes dignitates promovebantur. sic igitur Roma facta est velut maximum omnium virtutum theatrum. & certè florente reipublica, & libertate, tam egregiè se gesserunt ciues Romani, vt nulla reipublica dederit eiusmodi exēpla, vt nos docet Lilius in principio historiæ. sed tēpus est, vt transeamus ad alteram mutationem. ad tantam magnitudinem peruenerat reipublica Romana, vt præ magno pondere nutaret, & lapsura videretur. rectè & sapienter dixit ille:

----- *Summisq; negatum*

Stare diu.

Ho.

Horatius cum loqueretur de causa bellorum
ciuiliū scripsit:

Suisq; Roma viribus ruit.

Orbem quasi inter se diuiserunt tres poten-
tissimi ciues Crassus, Pompeius, Cæsar. Cra-
sus pollebat diuitijs. Pompeius nitebatur
magnitudine rerum gestarum. in Cæsare erat
maxima in rebus gerendis & celeritas, &
dexteritas, ne iam dicam de eloquentia, & vir-
tute militari. Crassus citò periit in expedi-
tione contra Parthos. supererant Pōpeius &
Cæsar. Pompeio cedere nolebat Cæsar. Pom-
peius Cæsarem ferre non poterat. hinc si mul-
tates, & aperta tandem odia. hinc bella, qui-
bus periit flos ciuium Romanorum, dire-
ptum erarium. res tota nulli non nota est, qui
vel obiter historiam Romanā vidit. vt verò
ad hanc mutationem propius accedam, sub
nomine dictaturę perpetuę cuncta ad se tra-
xit Cæsar. Dictatoris enim potestas non erat
minor Regia. & verò Græci Dictatores mo-
narchas vocant. nec aliud nomen habent,
quo dictatoriam dignitatem exprimant. iu-
re namq; belli Dictator habebat absolutam
potestatem in omnes. Cæterum quemadmo-
dum

dum quando exacti sunt Reges, aucta est senatus auctoritas. (Nam etiam sub Regibus erat senatus, sed non ea auctoritate pollebat, quantam obtinuit post pulsum Tarquinium.) ita postquam Cæsar arripuit perpetuam dictaturam imminuta est eiusdem senatus potestas, quod facile animaduertet quisquis rationem suffragiorum expenderit, quibus creabantur Consules. qua de re alibi me dixisse memini, & eruditè rem totam explicat I. Lipsius ad Annales Taciti. quid autem quæso consecutus est Cæsar immensa illa, qua flagrabat regnandi cupiditate? odium immensum Civium Romanorum, adeò ut tandem iuxta statuam Pompeij confossus fuerit, quasi victima. rursus. ut post primam mutationem sæpe periclitata est respublica propter frequentia dissidia, ut verissimè dixerit Tacitus Romanos non posse ferre totam libertatem: ita post Cæsaris Dictaturam imperante vno extrema experti sunt iidem in servitute. quæ quidem diligentissimè describuntur in annalibus. licet negare non possimus fuisse etiã inter Imperatores optimos, & laudatissimos, Augustos, Vespasianos, Traianos, Antoninos,

nos, & non paucos alios, sub quorum domi-
nato felicissimè vixerunt Romani. Nunc ad
vltimam mutationem propero. cur sedem
imperij Byzantium transtulerit Constanti-
nus non vna adducitur causa. sunt qui putant
ideò susceptum fuisse ab eo hoc consilium,
vt cederet summo rerum sacrarum præsidio &
arbitrio Pontifici Romano. Existimabat non
decere ibi degere Imperatorem, vbi esset pri-
ma sedes religionis. & sanè res ista admi-
ratione non caret, quod postquam Cæsa-
res dederunt sua nomina Christo, nunquam
amplius incoluerunt Romam. Scio aliquem
dicturum non opus fuisse ibi morari, post-
quam Constantinopoli, electa & fixa est se-
des. at subsecutis temporibus licet aliquan-
do Imperatores aliquamdiu degerint in Ita-
lia, alibi tamen quam Romæ habitauerunt. Cæ-
terum ego de hac causa translationis nihil
certi iam pronuncio, tantum refero, quid ali-
quibus videatur. Alij verò putant Byzantiū
migrasse Constantinum, & sui nominis urbem
condidisse, vt hac quoq; ratione nominis im-
mortalitatem sibi pararet. Verè enim locus
ille dignus erat, qui eligeretur sedes Imperij.

& satis

& satis notum est quid dixerit oraculum, quum Chalcedon è regione Byzantij condita esset, eos scilicet cæcos fuisse, qui neglecto loco, vbi iam Constantinopolis est, ex aduerso urbem construxissent. hæc ratio consilij Imperatoris verisimilitudine non caret. accedit tandem tertia, quam nonnulli adferunt. Senatus Romanus, cum certaretur de imperio inter Maxentium & Constantinum stetit à partibus Maxentij. quia hic Gentilis erat, & Senatores pleriq; omnes adhuc erant superstitioni addicti, & idololatriæ. victor tamen fuit Constantinus, & instaurauit longè latèq; Religionem christianam. quare minus amabatur à senatu. & ipse vicissim ob memoriam rerum præteritarum, & quia à sacris Christianis alienum norat, eundem auersabatur. quare optimum factu visum est, vt ab vrbe discederet. at quæ tandem mutatio fuit hæc in imperio Romano? Nam parum videtur referre ad statum imperij, sedes sit Romæ an Constantinopoli. sed audiat qui sic ratiocinatur, quid ego dicam. tantum momenti fuisse fuit hæc translatio ad mutationem imperij, vt viri docti, inter quos

I. Lipsius in libro de magnitudine Romana existiment ideò tandem concidisse imperiũ, quod sedes veteri loca mora fuerit. qua de re longa posset institui dissertatio. & forte ego suo loco agam prolixè de hac materia. interim obseruemus, & dicamus Constantinopolim non fuisse ita aptam ad reprimendos populos Septentrionales, qui semper fuerunt molesti Romanis. & certè tandem velut repagulis effractis, cum non adessent còsuetæ legiones, eruperunt, Italiam peruaserunt, Romam diripuerunt, nobilissimum corpus Imperij dilacerarunt, sedes etiam in Africa, & Hispania fixerunt. hoc illi non potuerunt efficere, quamdiu Romæ fuit imperij sedes. præterea locus ipse, & regionis Constantinopolitanæ constitutio nō videtur proferre ingenia ita apta militiæ, & laboribus bellicis. cum Roma olim semper dederit viros insignes fortitudine militari. numeremus, Imperatores Byzantinos, quotusquisq; fuit laude bellica conspicuus? nam Iustinianus potius per præfectos administrauit bellum, & maiestatem imperij, vtcumq; asseruit. **F I N I S.**

TRip' ex est hominum genus, in quorum manus opor-
 rim, ne incidant ha declamationes, primi nihil pro-
 bant, nisi quod viderint tessellarum instar, qui-
 bus vermiculantur pauimenta, compositum, qui leuissimas
 etiam script. unculas per anxias & repetitas inuersiones de-
 corant an dedecorant. imitati puellas illas, quæ pallidulae,
 succicassæ è strato cum se proripiant, antequam domo pro-
 deant, ad speculum per arumnosum ancilla ministerium,
 edificant emptis capillis verticem, oblinunt, & obumbrant
 cerussa faciem, & breuicula cum sint vt pumilones, par
 crepidarum supponunt plantis sesquipedale tantum, ne,
 quæ sunt, à curiosis oculis deprehendantur. Alteris humi
 repit, quicquid intelligi potest, tritium sapit, quod ferrea
 metaphora non est. plebeium censetur, quod dyceon furore
 non ampullatur. Reliqui sic agmen claudunt, v. cum no-
 rint quæcumq; in hac diem dicta, ficta, nauticam putent
 olere libros eos, in quibus perpetua serie connexa non dete-
 guntur arcana. Ego verò ultro fateor, a me non esse
 hæc exarata, quod sperarem Delicatulis, Aenigma-
 tics, Omniscijs placitura.

46
Adm. Reu. D. Franciscus Maria Gualterottus Can.
Floren. videat, an in hoc opere aliquid contineatur
quod Fidei Christianæ, vel bonis moribus repugnet
seu aduersetur nobisq; inferius referat. 1. Iulij 1630.

Petrus Niccolinus Vic. Gen. Flor.

Opus hoc à grauissimo Doctore Paganino Gauden-
tio erudite conscriptum pro mandato mihi mune-
re, iuxta noui Indicis Regulas examinaui, & cum
nihil inuenerim quod Catholicę Fidei repugnet, hac
mea inscriptione prælo mandandum censui.

Die 10. Iulij 1630.

Franc. Maria Gual Can. Flor.

Imprimatur Florentiæ ordinibus consuetis seruatis,
10. Iulij 1630.

Petrus Niccolinus Vic. Gen. Flor.

Has declamationes eruditissimi D. Paganini vidi
ego Hieronymus Rosatus Consulor S. Inquisitio-
nis, & in ipsis non vidi quid contra fidem aut bo-
nos mores, ideo tipis dandas iudicaui.

Die 13. Iulij 1630.

Idem qui supra.

Imprimatur. Die 15. Iulij 1630.

F. Clemens Egidius Inqu. Gener. Flor.

Stampisi. Adì 22. di Luglio 1630.

Niccolò dell'Antella.

CORRIGENDA.

Pag. 8.	lin. 20.	usu	usum
16.	22.	quæ	qui
33.	vlt.	posse	potuisse
35.	7.	Iouiniano	Iouiano
46.	1.	ipſius	ipſis
48.	8.	imperum	imperium
51.	23.	aptiſſimam	aptiſſimum
54.	19.	memoria	memoriae
56.	post; admiratione, inferre,	geſſiſſe	
56.	3.	ſollertiz	ſolertiz
61.	8.	orant	erunt
68.	23.	ſequuntur	ſequuntur
68.	24.	ſqualentes	ſqualentes
83.	4.	quid	quidem
88.	22.	poſt ſedes	adde: ne
	24.	dele fuiſſe	